

ASO GAFUA, 22 IUNI 2020

Na nofoia e le Fofoga Fetalai le Nofoa i le itula e 9:03 i le taeao.

Tatalo.

FOFOGA FETALAI: Ou te faasilasila atu ua toe amataliaina Taualumaga ma Galuega a le Fono Aoao Faitulafono.

Ia, avea lenei avanoa ou te faatalofa atu ai ma le agaga faaaloalo i le paia o le Palemene, lau Afioga i le Palemia ma le Kapeneta ae faapea foi Ofisa Sili o Pulega o Matagaluega ma Faalapotopotoga a le Malo i lenei taeao. Ae tatou te le i faagasolo le tatou Galuega, ou te muai tapa lau Afioga i le Palemia mo lau Saunoaga.

SAUNOAGA FAA-MINISITA A LE AFIGOA I LE PALEMIA

Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI (Palemia): Faafetai i lau Afioga i le tuuina mai o le avanoa ou te fai ai sau lauga faa-Minisita. Lau Afioga i le Fofoga Fetalai ma le mamalu o sui usufono o le Fono Aoao Faitulafono o le Malo o Samoa. Ua uma ona e tapa tulia i le tata, ua togipa foi tauileave le tatou faapolo ma le faasagi i le Atua o Samoa, aua le viiga, o le faafetai ma le faaneetaga i le Atua i lana pule faasoifua, ua ia taitai mai ai le soifua o sui usufono mamalu o le Palemene aua le Fonousu, le Fonotoa, le Fono mamalu a le tatou Palemene i lenei taeao fou, taeao totoa, taeao na atofa, e le o se taeao na faafuaveta.

Faamalo maleifua mai i faguga lelei lau Afioga i le Fofoga Fetalai ma sui usufono mamalu o le tatou Maota nei. Faafetai i le tapuaiga mamalu aua paia faale-Malo i le afio o Le Ao o le Malo faapea le Sui Tofia, tainane paia faale-Ekalesia aua le soifua fealofani o taitai o Ekalesia Kerisiano uma i Samoa o lo o latou tauasuina le ipuvai o le soifua faaleagaga e auau i le nonofo fealofani, le filemu ma le feoeoeai o le au faatuatua, ma taua ai tatou o fanau a le Atua pei ona fetalai manino lo tatou Alii i lana lauga i le mauga, lauga faamanuia. O paia faale-atunuu aua Aiga ma latou Tama, faapea foi Tama ma o latou Aiga, le usoga a Tumua ma Puleono i Salafai, o outou paia sa ma faigata, o le a faataalolo.

A o le i faagasolo ona tali atu le Aiga Minisita i mataupu esese na laga i saunoaga a sui usufono mamalu o le Maota. Ua ou manatu e lelei ia ona ou toe tulai atu ma le agaga faaaloalo e toe faatepa ma faamanino se mataupu ogaoga sa laga e se tasi o sui usufono o le tatou Maota nei, na ia fesiligia ai le faamatuu ese atu o meatotino po o aseta a le tatou Malo i tua mai le taimi a o avea ai le Afioga ia Tofilau Eti Alesana ma Palemia o le Malo, ma matou uma sa i ai i le Kapeneta sa matou faitonu faatasi aua tonufai o le Malo faapea foi ma le tuua o le na fesiligia le Maota lenei, sa saofai ai i totonu o le Kapeneta ma matou faamaonia faatasi le faiga faavae fou lenei faapea ma le tele o nisi tonufai o le Malo, ma oo mai ai i lou taimi o faagasolo pea. O le malosi o le gagana na molimoli mai ai le tetee a le sui usufono, e tutusa lelei le gagana na faapea foi ona osofaia malosi ai le Malo i lena vaitau e le sa avea ma Taitai o le Itu Agai. Ua ou le toe soona teiteivale ai ona ua ou masani ai. E pei lava foi lele o se pese e ta ma toe ta, toe ta, toe ta a o le fati lava e tasi ma upu lava e le suia.

Lau Afioga i le Fofoga Fetalai, o le faiga faavae a le Malo, o le faamatuu ese atu o nisi o aseta po o meatotino e aofia ai foi nisi o sea a kamupani nei na umia e le Malo, e afua lea i se faiga faavae fou taua tele a le tatou Malo e tuutiitia ai le gau aano po o le maua foi o seleni le le maua foi o seleni sa tatau ona maua ai e le Malo. O le igoa i le Gagana Igilisi o le faiga faavae lea o le privatization policy of Government. Ae fai mai isi economists o le right sizing of the Government structure to reduce waste of Government funds. O le faamatuu ese o aseta ina ia taofia ai le faamaumau o tupe i faiga piopio ma faiga soonafai. Ia, o le tali puupuu lena o le faavae fou lea na afua ai le faamatuu ese lea sa faitioina e se tasi o sui usufono.

O upu masani a faleupolu, e suisui faiga ae tumau faavae. O a ia faiga faavae? Tipi le gau aano ae faasao tupe soona faaalu maumau. O se faataigaiga; Esetete Tausi, o se faatoaga ola i le taimi o Niu Sila, e faaigoa e isi o le faatoaga i Etena, tele povi, tele le popo e ao e asini se i tulou, koko, kofe, ua le masino, o le oa na faamanuiaina ia Samoa mai le faatoaga lenei, na iu lava ina lafo i fafo i Niu Sila ma Europa, e pei ona ou taua i isi o au faatalanoaga. O Samoa o se tasi o le 14 atunuu o le lalolagi o latou ia sa maua atu ai le high flavoured cocoa e fai ai le sukalati, sa lau i Hamburg i Siamani. O popo mago na lau i Peretania.

I uluai faigamalo mai le tausaga 1962 faaasolo mai ai, oka o se Esetete Tausi e ola, lau i fafo le anoano o le popo ma le koko. Uma loa na faigamalo a nai toeiina sa i ai le tofamamao taofiofi, sosoo loa ma uiga ia na taua e le sui usufono o Salega fai mai o ni uiga lelei, ua mafai ai ona fai ai nogatupe e pei se Faletupe a Sui o le Komiti e pulea le Esetete Tausi, fai ai o latou fale, fai ai falesa o isi, ua taaalo mai luga i le pulega, taaalo loa foi latou i lalo o tama ia e vaaia povi, koko ma popo. E pale mai la le HRPP i le 1982, ua kanesa loaloa le Esetete Tausi, ua uma fofu e le fofoina lava le mai ua mai ai le Esetete Tausi, sosoo loa ma le osofai mai e le afa o Ofa i le 1990,

toe afa tele i leValelia na agi i le 1991, toe polili mai e isi mau afa mulimuli ane ai, a fua i le fesuaiga matuia ua i ai nei le tau i le lalolagi, na matua toli mama ai fua o niu, suaki i luga ma isi niu ma koko, kofe, o le a la le mea e tatau ona fai e le Malo fou ua faatoa tulai i le foe le HRPP? faaoga loa le faautaga tatau foai fua mai e le Atua, be the best we could with what we had. O le aso ma le filiga, o le aso foi ma le mataigatila, fuata ma lona lou. Ae fai mai le poto o Solomona, “There is a season for everything under the sun.” O le taeao ma le mea e tupu ai, 1990 i le 1991, faatu loa se faalapotopotoga tumaoti a le tatou Malo, Samoa Land Corporation. O i latou ia e silasila totoia i le faiga tatau e faaoga tatau ai fanua po o aseta a le Malo, o aseta e pulea ma umia e le atunuu atoa, Savaii, Upolu, Apolima, Manono, ae taitaifono ai le Minisita o Tupe, o le uluai Taitaifono lea, o au lea. Lea e fai mai isi o le kamupani a Tuilaepa, e le malamalama i faiga faavae a le Malo, faatu loa se kamupani e i ai le Minisita o Tupe ma le Failautusi o Tupe e tusia ai o latou igoa, o i latou e umia sea ia on behalf of the government mo le Malo. O le latou galuega e atiae ai taumafaiga a tatou tagata ae taofi na o le 6,000 eka o nei elelee po o aseta a le tatou Malo e faaauau ai pea le Esetete Tausi, ae mataitu le Malo i le toe taumafai i ni auala e toe faaleleia atoa ai lenei faatoaga, faatoaga tele a le atunuu, aemaise o lo o tulata i le malae vaalele o Samoa. O le faitotoa o le ulufale ma le ulufafo o e femalagaai, tagata o le tatou atunuu ae faapea foi ma tagata asiasi maimoa mai, o lo o tafe mai ai le oa e atiae ai lo tatou atunuu, e ono toe moomia ai le toe faatele o le malae vaalele i le agai atu i le lumanai mo le uunaia atili o le atinae lenei o turisi i Samoa. O se atinae taua mo le tamaoiga, aemaise o le a faaauala mai nei manuia i le faaleleia atili o le malae vaalele faapea foi le toe faaolaola o a tatou kamupani vaalele, aua le atinae o faletalimalo ma faleaiga, o atinae o taavale laupasese, taxis, o atinae pasi, o faleoloa, o meataulima ma mea eseese. O le aufaifaatoaga ma le aufaifaiva e taumafai ina ia taulia ai nai a latou taumafaiga i faletalimalo, aua e manaomia e faletalimalo taumafa, o ia, o mea aano faapea foi ma fualaaui aina mo le tapenaina o taumafa e i latou e asiasi mai i Samoa nei. O lona uiga, o atinae tau turisi e faasafua atu le manuia i le atunuu atoa.

Lau Afioga i le Fofoga Fetalai, o le taua lena o le atinae lenei soosoo tauau o malae vaalele ma faletalimalo. A o le i oo mai le Koviti-19, pe a ma le \$.5 pilion na maua e le atunuu mai turisi i le tausaga, o lo o fai lea ma sao tele lava i a tatou teugatupe e faaagaaga mo fefaatauaiga. O le taofia la o femalagaiga a vaalele ona o tatou tapu mo le puipuiga mai le faamai o le Koviti, lea faatoa malamalama ma silafia manino ai e le toatele o le tatou atunuu le taua o atinae nei tau turisi, atinae a vaalele ma malae vaalele i atunuu uma o le lalolagi lea e vaai maualalo i ai nisi, fai mai se i tulou le Maota pe fai nei mea e ai. Ua matua maua uma ai pisinisi i le le mautonu ma iu ai ina faamalolo le toatele o tagata faigaluega. O le faamatuu i tua o aseta a le Malo lea sa faitioina, e tuuitiitia ai le gau aano o le Malo lea na vaevae

ai loa le tele o fanua o le Esetete Tausi i Apia faapea foi ma nofoaga tulata tai kuata eka, ma maua ai nai fanua umia saoloto o le toatele o tatou tagata vaivai mai nuu i tua, i Upolu, Savaii, Manono ma Apolima, e aumau ai i Apia aua fanau aoga ma galuega i le tele o eleele nei e faamatuu i Falelauniu, Tafaigata, Vaitele, Vailele. O lo o mafai foi ona maua ai nai fanua o le toatele o le aufailotu e litaea i ai aua galuega ma aoga a fanau laiti. O lea ua maua ai foi ma fanua o sui usufono ia e toalua e faitio nei e fai ai a la pisinisi, o faleaiga, o fale kalapu, o aiga o faaipoipoga, faleoloa tetele, pamu penisinisi, fai ai la taaloga o le bingo. Ua maua ula futifuti, toe faitio e faavae i le vaavaai masei. O nisi o latou ia, ua le na o le kuata eka, ua 2, 3, 4 eka. Ia se i silasila? O isi o le au mauoloa ua toe o faatau kuata eka a aiga ona ua tele le tupe e maua mai ai, \$150,000, \$200,000, tiai atoa ai lava eleele na avatu e le Malo e nonofo ai isi o le manao i le tupe i le taimi nei, ona toe omai foi lea toe o toe talosaga, o la e maua i faamaumauga. O isi ua mafua ona tele a latou kuata eka, ona ua ese igoa ua faaulu atu, misi atoa i le vaaiga a le SLC. O le ala lena o lea ua liliu ai le iuga a le Malo, faa-lisi fanua ina ia tumau ai pea eleele nei aua ne i toe mafai ona toe faatauina. Ma o le mafuaaga foi lena ua fautuaina ai aua ne i toe tanuina ai se isi o aiga, lale ua tele le 20 ma ona tupu eka i Tafaigata e teu ai aiga, pe faavagavaga pea eleele nei, a alu alu alu ua le mafai ona totogi toe foi mai lava i le Pulega, toe sue isi tagata e ave i ai. O le faiga lena e taofia ai le mea lena o le matapeapea. O le ala foi la lena mo latou o lo o faafogafoga mai e fia faatau motu, o le tulaga tonu lava lena ua tapu ai le toe faatau motu ae faa-lisi, ona e o atu loa le au maumea ma le fia selau afe, ona sese ai loa lea o faaiuga ma tele ai lava fanua o latou e tele tupe.

E malamalama lelei lava nei faiga faavae a lo tatou Malo, ae e i ai isi ua le fia malamalama, aemaise i latou ua faaseseina i le malosia o le tiapolo, small knowledge is indeed dangerous knowledge. O le agaga atoa lava lau Afioga i le Fofoga Fetalai, o le faiga fou lea a le HRPP mai le taimi o Tofilau Eti Alesana, Polataivao Fosi ma isi, e aofia ai ma au nei, sa ou nofoia le nofoaga o le tofiga o le Minisita o Tupe e tau faasoasoa nai seleni utiuti a lo tatou Malo. A o le agaga atoa, tipi le gau aano, o le privatization policy, e le na o Samoa, e o uma ai atunuu o le lalolagi, ua mulimulitai uma ai atunuu ona ua matua mautinoa foi e latou, so o se atinae faitele, o lo o lotolotoi ai le Malo, e iu lava ina gau. Aisea? E i ai lava le natura o le tagata ola e le matineia, e le na o Samoa la e maua ai, e tupu ae ai pea le manatu ia i latou o galulue ai, se o mea faitele, fai lou ivi, a o maua lou avanoa. E tupu i Samoa, tupu i Niu Sila, tupu i Ausetalia, tupu i Amerika, tupu i Peretania, tupu i Rusia, tupu i atunuu uma lava o le lalolagi, ona o le natura lea o le tagata. E oo loa i mea faitele, ona faapena lea ona le atoatoa se i vagana lava o ni au lava mea faatoa ave i ai le atoatoa o lou faamaoni. O le mea tonu lena na gau aano ai le Esetete Tausi na mafua ai ona fai loa suiga tetele nei e le HRPP. Sa faitioina i lena taimi, ma e talu ai o le Minisita o Tupe sa tutu i luma ma defend le

policy a le Malo. Ia o le mea tonu lena lau Afioga i le Fofoga Fetalai ma le mamalu o le Maota lena na mafua ai ona fai loa suiga tetele o lo o faitioina nei ona faasolosolo atu ai lava lea o lena faiga faavae e aofia ai le Vailima, le Brewery, le Hotel Tusitala, faletupe o Samoa, le Bank of Western Samoa, le SamoaTel ma isi lea sa taua i le lauga, o le faiga faavae lava lea e tasi, ona o latou uma nei, o kamupani lava o lo o tele le sao o le Malo o lo o i ai.

E i ai foi manatu ua tutupu ae, e tatau foi ona asiasi atu i se isi taimi i le Samoa Airways mo le amata faamatuu atu foi o se vaega o ana sea faavae i tua, ina ia fai foi se sao o le aufaipisinisi latou e aumai ai so latou sao i tupe manaomia through capital injection mo le faagaoioi o le tatou vaalele, e pei foi ona faia e isi Malo na mua i malae i faiga faapenei, pei o Niu Sila, Ausetalia ma isi atunuu tetele. O uiga ia masani o faiga pisinisi faapenei, ua i ai foi latou o isi investors ua omai talosaga mo ni o latou share e fia maua i share faavae o le kamupani vaalele o le Samoa Airways po o le avefua lea a Samoa. O se itu lelei, e aumai ai i totonu le aufaipisinisi ma omai e lagolago le tatou avefua a le atunuu ae le o saga faaluelue i avefua a isi Malo.

Lau Afioga i le Fofoga Fetalai, e afe ma afe faiga eseese e mafai ona fai, e ola ai se Malo. E pau o le mea, ia malamalama tagata i mafuaaga o lea faiga faavae ma lea faiga faavae.

O le fili o nei taumafaiga uma o le toatele o tatou e matua le fia malamalama, e pei lava foi ona toatele na tetee ina ua faaofi mai e le Malo le isi faiga faavae, ina ia maua gofie ai taavale a tagata o le tatou atunuu. O lo o i ai aiga i Ausetalia ma Niu Sila ae faasa ona aumai, ona e tatau ona sui a tatou Tulafono ina ia mafai ai ona o taavale i le itu taumatau, i le itu tauagavale. Lau Afioga, fai mai le molimau mo sina faataitaiga, a le Komiti a le Palemene lea e nafa nei ma le faatalanoaina o Tulafono Tau Faaofi. I luga o latou faatalanoaga i upega tafailagi, e i ai lava latou toaitiiti ua matua utia i talaiga a le tiapolo. Fai mai, ua matou matua malamalama lelei i le matagofie o le faamoemoe o le puipuga o tatou pulega mamalu o alii ma faipule i tulafono tau faaofiofi nei e 3 o le Faavae. Ae faamolemole faamau pea la matou tetee, tetee malamalama ma le fiafia i na faiga lelei, o fuafua e Tulafono Tau Faaofi. E pau lava o le saolotoga, saolotoga o le tagata e le fia talia ai ni mea lelei. E le te'i ai le kerisiano, e faapena foi le afio mai o le Alii, ma lana ia foi talalelei. Ae o le tele lava o le au ositaulaga, o lo o latou laugaina le feagaiga tuai, aua e oo mai i le taimi lena e le i ai ni tusi o le feagaiga fou, faatoa tusia mulimuli. Ma o latou iloa ai, le afio mai o le Mesia. Ae na o latou teena, na o latou teena foi le Mesia i lo latou foi vaitaimi. E le o se mea fou la lau Afioga i le Fofoga Fetalai, e le o se mea fou le i ai pea o nisi e tetee i le mea lelei o lo o tau fuafua. O lo o i ai pea la tagata faapea i le lalolagi. E afua i le latou foi aia tatau e tetee faasoloatoa ai i so o se mea lelei e fai e lo tatou Malo.

I le tulaga e tali atu ai i le faletalimalo o le Tusitala lea foi na faitioina. Na fausia le faletalimalo lena, i le va o le 1970 i le 1973, 50 tausaga talu ai. O

le tulaga o lo o tu ai nei le Tusitala, sa tu ai i ina le faletalimalo tuai o le Casino Hotel, na fausia e Siamani, peitai ua i ai le finalo o le Malo, le afioga ia Tupua Tamasese Lealofi IV, ua tataua ona tuu i lalo lenei faletalimalo ua tuai, ae fau se faletalimalo fou. Ona tofia ai lea o le komiti toa 3 faigaluega, e faatalatalanoa le tuu i lalo o le faletalimalo tuai ae fau loa se faletalimalo fou, 50 tausaga talu ai. O le faletalimalo lea o le a faaigoa o le Tusitala. O le Taitaifono o lenei Komiti, o le tofia ia Tuiloma Ann Slade. Sa ofisa sinia i le Ofisa o le Loia Sili i le tausaga lea. O Hans Kruse o le Pule Sili o le Matagaluega o le Atinae o lo o soifua pea, ia ma au, o le Ofisa o le tupe. Na fausia le faletalimalo lenei ma le faamoemoe, e ono gau i le uluai 3 tausaga sosoo. Ona amata loa lea ona tafe mai pe sasaa mai le mauga o faulaiga tupe faasili o le a le iloa e le Malo ona faasoa, i le tele. Aua e na o le pau lea o le faletalimalo e sili atu na i lo Aggies i lenei vaiata. Peitai ane e le o lea le mea na tupu. E tai miliona tala i le tausaga na gau ai mai lava i le amataga. E mai lava i le tausaga na tatala ai, seia oo mai i le tausaga amuli na ou Minisita ai o tupe. Sa ave i ai e le Malo le tai miliona tala i le amataga e tau faaola ai. O miliona nei i tausaga le la, a fua i le tulaga ua sui ai le fesuaiga o tupe, masalo e tai tutusa ma le 5 i le \$10 miliona, i le tala i le taimi lenei. Ina ua tofia au e avea ma Minisita e le afioga i le Tootoalii. O au la na faia le fautuaga, ua tataua loa ona tuu atu i tua lenei faletalimalo, na o le gau, gau, gau, gau o le Malo ae sefe tupe a le Malo. O le faletupe o Samoa sa taua o le Vailima ma le SamoaTel o le faavae lava lea e tasi, na fai ai foi iuga a matou sa i ai i totonu o le Kapeneta, ma faamatuu atu ai i tua ia aseta nei a le Malo i le agaga lava e tasi. A taofi le gau, faasao tupe a le Malo. O le tetele i na ona aso mai le Itu Agai, e faapea. O lo o maua pea tupe mama a nei Kamupani a le Malo, aisea e toe faatau ese ai? O lau tali i lenei taimi o le Minisita o Tupe, ma o lo o saolele pea e tau mai i le taimi nei, aua, aua, aua, aua nei faaseseina tatou i nai pepa pinati ia e maua mai i lenei taimi. Vaai mamao i le luma i itu aoga tetele, e maua mai. I tua atu o pepa pinati na maua mai i na taimi, ina ua tupu tele le pisinisi, i le toso mai i ai o tupe faaopoopo mai lala i fafo. Aumai i ai ma le au popoto faapitoa i ituaiga pisinisi nei tetele faava-o-Malo, e le i taitai i lenei vaiata ona oo i ai le tomai o tatou tagata, aemaise o pisinisi nei, o lo o i ai o latou lala tetele i atunuu tetele o le lalolagi. E tele foi ni seleni e tua i ai pisinisi nei, i taimi o faigata e feagai ma le lalolagi, e maua mai ia latou lala tetele nei, o lo o i atunuu tetele o le lalolagi.

O le Vodafone la, o lo o umia se vaega o share faavae o le tatou faalapotopotoga o le UTOS, na faatuina faapitoa lava ina ia faatinoina le galuega lea, ia umia ni share faavae i totonu o le tatou SamoaTel lea o le a faatau. O le UTOS o se faaputugatupe lea, e fai sao i ai tagata o Samoa e fia teu faa-faigaluegaina ai a latou tupe i share faavae o le Vodafone, ma nisi foi kamupani o le a faatuina faapenei mai fafo. O kamupani e faatu i Samoa ae faafoe e le pulega o le UTOS gaioiga uma, mo ia fuafuaga lelei. O le

Vodafone la lau Afioga i le Fofoga Fetalai, o se pisinisi o lo o fai share i ai tagata o le tatou atunuu, e auala i a latou teugatupe i totonu o le faalapotopotoga tupe lea na faatua faapitoa e le Malo. Ina ia mafai ai ona fai ni tatou share kamupani tetele faape nei ua privatize. Ma e sili atu ona tele le tufatufaga e maua mai i le UTOS nai lo teugatupe i faletupe. O le a toe faalatele atu e le Minisita o le Kapeneta nisi o mataupu e faasino i faitioga le faavaea na fai faasaga i faiga faavae ia a lo tatou Malo e faamatuu ai i tua nisi o ana aseta, po o meatotino e tipi ai le gau aano o seleni a lo tatou Malo. Ae televave atili ai a latou galuega fai, ma atili vave tupu ai galuega mo fanau a Samoa.

O Kamupani tetele ia, e vave tupu ai foi le tamaoaiga o Samoa, afua i le lava o latou seleni ma tagata popoto masani faapitoa, ua latou aoaoina i metotia eseese faaneionapo, e faapitoa i a latou lava foi ituaiga pisinisi. E faafetai faafetai tele le lagalaga mea, pe ana le lauga ai ia sui ia e toa 2 i le agaga saili masei, e leai foi se toe faamanatu e faasaosao ni tuuaiga le faavaeina.

Lau Afioga i le Fofoga Fetalai ma le mamalu o le Maota nei, o le faaiuga lena o lau tautalaga ina manino vaega ia ona o faiga faavae lea e mafua ai le tulaga lea sa laga laga. Manuia tele le Fonotaga. Soifua.

FOFOGA FETALAI: Malo faafetai, ia o le saunoaga lena a le Afioga i le Taitai o le Malo po o le Afioga i le Palemia, e faamalamalama ai nisi o finagalo i mataupu sa laga mai e nisi o sui usufono o le Palemene. O lena ua manino le tulaga o le faamalamalaga o mataupu e pei ona laga.

O le galuega o le aso tau le Malo o le faitauina o Tulafono Tau Faaofi...

Susuga Hon Laauli Polataivao Leuatea (Gagaifomauga Nu.3): Lau Afioga i le Fofoga Fetalai, i le agaga lava ma le faaaloalo. E na ona ou apaapa atu lava lau Afioga i tatou Faiga Faavae. Ioe, o lenei sa matou tautala atu ma le agaga faaaloalo e avatu le tuualalo i le tatou Tala o le tupe, ae o lea ua matau, ua aumai le saunoaga faa-Minisita e tapu ai maua ona tali atu, i nei tuuaiga matuia ua sau.

FOFOGA FETALAI: Ua ou leai atu....

Susuga Hon Laauli Polataivao Leuatea: E na ona ou tapatapa pea i le pule a lau Afioga i le Fofoga Fetalai. E le o faamaoni ma talafeagai le mea lea ua fai. E le mafai ona ma tali atu i tuuaiga tuga lea ua aumai. Faamolemole lau Afioga i le Fofoga Fetalai, na sasa mai lava ananafi le Aso Sapati, o lea ua oo mai foi i le taeao lenei ua toe sasa foi.

FOFOGA FETALAI: Malie lau Afioga, malie lava lau Afioga le sui usufono mo Gagaifomauga Nu 3, ma le sui usufono foi mo Salega, e vaai

atu foi pei e tau fou mai foi lona vaa. E leai o lea sa saunoa le Palemia, o le saunoaga faa-Minisita, seiloga e faatu se lafo ina ia faataatia, i le Maota fonu. Ua ou tuuina foi le avanoa mo le saunoaga faa-Minisita e faamalamalama ai nisi o mea sa laga, ona alo loa lea i tali a le Malo. E pei o le tulaga lena, o la e maua le avanoa e fesiligia ai tali a le Malo ma tali a Minisita, le aiga Kapeneta, pe a oo i ai. E oo foi ia tatou mea taitasi, e tai 2 lava avanoa e tai 15 minute. E manatu e faamanatu atu lea vaega i lau Afioga i le sui mamalu, ona o le puipuiga o tatou Tulafono Tumau.

Susuga Hon Laauli Polataivao Leuatea: Ioe lau Afioga i le Fofoga Fetalai, o lea ua oo i ota matua ua fai i lagi le folauga. O le eli tuugamau le mea lenei e fai o le fai ma faaleaga.

FOFOGA FETALAI: Malie... ou te faamalie atu.

Susuga Hon Laauli Polataivao Leuatea: Malie lau Afioga i le Fofoga Fetalai, e tuga le mea lea i le faafofoga mai o le aiga ma le atunuu.

FOFOGA FETALAI: O le avafatafata lea e mafua ai ona ou taumafai atu. Ou te le i oo lava i le faamalosia o tatou Tulafono Tumau. Ae i lau lea matau, ua toe taua i le saunoaga a le Palemia ia lou tuua, aua sa lotolotoi ai i i, ia le afu foi o lana tautua matavela. Aua e tasi lea sui mamalu e faapena ona afu lana tautua e ala i upufai o Malo. E faapena, o lea la ua toe faamanatu ia galuega lelei sa o latou faia, aua sa seei ai i totonu o le Kapeneta. Amuia foi lau Afioga ua faapena ona e tulai mai, ae o lou tuua sa lotolotoi ai i totonu. O se tasi foi sa faapena ona faamoemoeina, na ou oo mai foi au i le Palemene ia sa faapena, sa ou fai mea faalogo foi i ai i le toeaina. E tasi lena faiaoga, aua sa fesili lava mulimai ia muamai. O se itu e pito sili lea na lelei lea na faamanatu nei e le Palemia, e le o faaleagaina le toeaina, e leai. O latou sa auai i le faiga o Faiga Faavae ia a le Malo, o le tulaga lena.

O le galuega o le faitauga o Tulafono Tau Faaofi...

Afioga Hon Faumuina Tiatia Faaolatane Liuga (Palauli le Falefa): Lau Afioga i le Fofoga Fetalai, leai o le mea lea e fia faatu atu se lafo, *E faataatia le Saunoaga a le Palemia i luga o le Laulau a Fono.*

Ma lou faaaloalo lava.

FOFOGA FETALAI: O ala la ia o mea.

Faaluaina e le Minisita mo Fesootaiga, Faamatalaga ma Fesootaiga Vavave Faaneionapo ma le Sui usufono mo Gagai fomauga Nu 3.

Na faamaonia le lafo.

FOFOGA FEALAI: O ala ia o le tatou galuega. Se i tulai mai Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Ou te tulai atu e faamalulu atu i le sui usufono. Afai ua ia faitauina le tulaga lea, o se faaleaga po o le sasa, e pau lava le mea a au lea e fai, o le faamalamalama, e faamalamalama. E oo foi la i le po anapo, o lou tali atu o oe e usu a o au lea e faamalamalama. O lea la e tatau ona e faapea mai, faafetai Tuilaepa ua e tau maia ni fuafuaga lelei sa fai e Tofilau ma lou tama ma matou uma. Ou te le o faaleaga la i lou tama, o lea ou te siia i luga, aisea? Vaai i le manaia o tonu fai na fai, ae maua ai le fanua e fai ai au pisinisi. Lau Afioga i le fofoga Fetalai, o lea ua aeae i mea na matou faia ma lou tama. E le o se mea leaga la lea na ou tulai atu ai, o le mea lelei ina ia malamalama. Ae na o oe lea e te sau lagalaga mea leaga. O au la lea e fesoasoani atu e faamalamalama mea sese ia e te faasalalauina i le atunuu. Ma ia e nofo uta, so o se taimi e fai ai sau faasalalauga sese, po o fea lava e te agai i ai, o le a ou alu atu lava e faasao, e faamatala ma faamalamalama.

Susuga Hon Laauli Polataivao Leuatea: Lau Afioga i le Fofoga Fetalai, i le agaga lava ma le faaaloalo, o lenei lava e faaaoga le avanoa o le Afioga i le Palemia, e fai ai pea le faaoloataua.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O le tulaga lena, ae le o se sasa, o le faamalamalama. O lou tulai atu lena e faamalamalama atili lau mataupu, e le tau faamalamalama mai e se isi.

Susuga Hon Laauli Polataivao Leuatea: Aua e te vaai maualalo i nai ou manatu. Aua e te vaai maualalo, e te under estimate ina. Ioe, e le sao uma mea e te faia. E le sao.

FOFOGA FETALAI: Ou te faamalulu atu i lau Afioga, o le solifono lou le maantu mai i le Nofoa. O lenei lava e manatu e palepale aluga le tatou mataupu i le agaga faaaloalo. O la e tapuai mai o tatou faiva e le atunuu. Ioe, o lea lava ou te taumafai e faamanino atu ia vaega ia. O le tiute o le Malo o le faamalamalama o mataupu sa laga ia outou saunoaga. E faapena, o le mea foi lea ou te fautua atu ai, i le paia o sui usufano mamalu o le Kapeneta, e fai fuafua saunoaga aua e le o i ai ia... tulou nei sala le gagana. Aua e le o i ai Tuivalea i le Kapeneta ma le Palemia, o la foi e i ai a latou faamaumauga. Ioe, o le mea la lea, se i saunoa e fua i luma fua i tua. Aua foi le anu leaga e

fai mai le atunuu, aua e te anu i le matagi leaga e toe foi mai. Ae ia e saunoa e solisoli muliaao... sa faiaoga ia te au...

Susuga Hon Laauli Polataivao Leuatea: Malie Toleafoa e faamalulu atu lava, e faamalulu atu lava i lau Afioga i le Fofoga Fetalai, ia paga lava lea. Se i saunoa ifo la i le Palemia, e fuafua mai ai foi ana tala. O le manatu ea ia o le a e saunoa mai nei la ia te au, ae le se i fuafua upu ia. E le mafai, e le o au o se atua, o la e tapuai lou itumalo ma lou aiga, o lo o saga ta lafo pea nei upu le mafaufau.

FOFOGA FETALAI: Malie ia le saunoaga a le sui usufono...

Susuga Hon Laauli Polataivao Leuatea: Toleafoa, se na o oe ou te malu ai. Saunoa i le Palemia e tuu le le mafaufau.

FOFOGA FETALAI: E faamalulu atu, o a tatou Fonotaga, e taiala lava ia tatou Tulafono Tumau. Ae e muamua ona faaoga e le Fofoga Fetalai, le tulaga o a tatou tu ma agaifanua le tatou aganuu, i le tatou ava fatafata. Aua e fai foi o le tatou nanau i Tulafono Tumau ae manatu foi i le tatou tu ma le aga faasamoa. O le mea la lea ou te...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, ou te tulai atu e faamagalo i le sui usufono. Ae faagasolo ia... Laauli ua ou faamagalo atu ia te oe, ae o le fautuaga tatou faagasolo ia le tatou galuega.

Susuga Hon Laauli Polataivao Leuatea: Ua silafia e le Atua le loto, ua leva ona ou faamagalo ia te oe Tuilaepa. Ae paga lea, e ala mai foi i le taeao toe sasau, o lea foi o le a liliu atu le isi itu, liliu le isi itu, fai pea. O lea lava e folo le oona o au mea ia e fai. Ae ua uma ona ou faamagaloa oe, long time.

FOFOGA FETALAI: Malo faafetai. Ia, e fai mai foi le Tusi Paia, o le tatou Alii Faaola na fetalai e le faa-tasi, ae faa-fitugafulu ni fitu ona faapena ona fetuunai. O le mea la lea, tatou o ia i le tatou galuega.

**TULAFONO TAU FAAOFI O LE FAATATAUINA O TUPE
FAAOPOPO (NU.3) 2019/2020 & TULAFONO TAU FAAOFI O LE
FAATATAUINA O TUPE 2020/2021 – felafolafoaiga faaaauu i luga o
le faitauga faalua**

FOFOGA FETALAI: O lea ua tatou oo atu i le tali a le Malo, o lea o le a saunoa muamua le Afioga i le Minisita mo Fesootaiga, Faamatalaga ma Fesootaiga Vavave Faaneionapo. O le mea lea ou te tapa ma le faaaloalo lau Afioga Toeolesulusulu, po o lau Afioga foi i le matua o usoalii. E te tulai mai, se ua uma ia suafa mamalu o le itumalo, ia afio maia.

Tofa Olo Fiti Afoa Vaai (Salega Sasae): Lau Afioga i le Fofoga Fetalai, na o si tamai mea lava lea e fia faasao atu lau Afioga. O le afioga i le Minisita e le i afio mai i lona suafa Toeolesulusulu, o lea sa afio mai i lona suafa Afamasaga. Pe o le mea ua le fialia i le suafa pe o le a se mea o i ai i le Afamasaga.

FOFOGA FETALAI: Ua ou manatu o le itumalo lava e tasi. E faapena, o a tatou Tulafono... Se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Aua o le mea lava lea, o lea foi ua uma ona teuteu le Tulafono, a 100 lava ou matai i le itumalo, e sau uma lava i totonu o le Maota ma faalupe ai. Masalo ua galo i le sui usufono ua matua foi.

FOFOGA FETALAI: E ala ona ou le taua Levaopolo, leaga e ese le itumalo. O lea la ua afio mai i le Olo, ua ese foi lena, o Salega lena. A o o i le sui usufono le la o Afamasaga ma le Toleolesulusulu, o le itumalo lava e tasi o le nuu lava e tasi. O le faapupulaga lea.

Tofa Olo Fiti Afoa Vaai: E leai e le faafinai i lea mataupu o lea e manino. Ae manaia pe a faamuamua mai le Afamasaga o le suafa na oo mai ai ma toai taunuu mai ai le sui mamalu, po o le Afioga foi i le Minisita. Ae pei ua faamuamua le Toeolesulusulu ae faamulimuli mai ia le suafa o, leaga ou te tau foi i le Afamasaga, ona o le mea lena e pei e tau tiga ai lou loto.

FOFOGA FETALAI: Ua lelei, e ui lava ina e faatonuina mai au, ae ua lelei. O mea a tatou e faapena, e i ai foi mea ua pau i le Fofoga Fetalai, ia faamanatu mai, e uso lava suafa. Tulai maia Afamasaga Toeolesulusulu e te saunoa.

Afioga Hon AFAMASAGA LEPUIAI RICO TUPAI: O le mea taua lau Afioga i le Fofoga Fetalai i lenei taeao, o lona uiga e tele le taua o suafa nei, ua mafua ai ona finau le Maota.

Ua tala mai le lagi le mamalu o le Atua, ua faaalua foi i le vanimonimo galuega mamana a Ona aao. O lea ua ee i fatalele le tatou taulaga faafetai. Ia fusifusia foi i le Fatafaitaulaga le viiga ua siitia i lenei taeao, e ala i le tatalo. Ma faanonomanu ai foi i le Atua aua le filigatupetoga a le paia i le Palemene nei, lea ua amatalia i lenei vaiaso lona 2 o le Tauaofiaga. Ou te fia faatalofa foi i lau Afioga i le Fofoga Fetalai, faatalofa atu i lau Afioga i le Palemia ma le Kapeneta nei, aemaise foi o Afioga i Minisita lagolago, aemaise le paia o le Palemene, o outou ua vaelua i ai le suafa o le Atua, ma ua tofia foi e faatautaia Samoa i lenei 5 tausaga o le a faapena ona maea. E ofo alofa atu foi ma faatalofa atu ia outou Afioga o Ofisa Sili o Pulega o Matagaluega ma Faalapotopotoga a le Malo aemaise ia te outou o fai ma sui i lenei taeao, aemaise lau Afioga i le Failautusi o le fono ma lou ofisa, ma i latou uma o tautuaina lenei Maota.

Ou te muai lalagi foi sugalu ma ou momoli feetaga o tupu i lenei taeao aua Samoa ma lau tapuaiga. E mai lava i gagae le la i sasae, seia paia le tai ulaula e goto i ai i aso taitasi. Ou te manatu lava o ou paia Samoa ua ato tanu ma tafa'i lauao e le tau laeiina. Ona faapea lea o sau faamatalaga. Tulou, tulou tulouna lava.

E faatalofa atu i Samoa e fia o maimoa mai ma maua mai lenei faasalalauga i itu e 4 o le kelope. Aemise foi le tapuaiga malu a nai tama ma tina matutua i maota ma laoa. Ae faapena le paia i auauna a le Atua o lo o tapuaia o tatou faiva. Ou te manatu, o lea ua maea ona tuufala le lafoga, ae ua lafo foi le tupe mua i lenei taeao, le Afioga i le Palemia e tomatauina ai ma taimua aua le tali atu a le Kapeneta. Ua sina foi le falevaai o finagalo faaalua, ma ua faapena foi ona mamanulauti ma tauaao mai se faatofalaiga a itumalo taitasi. E le gata i manaoga eseese o itumalo ae faapea foi ma mafaulu ma mafatotoga o sa outou tuualalo mai, e poupu ai le sa o le Malo, aua le agai i luma o Samoa ma ona atinae. E faatalofa atu i si ou itumalo pele o Aana Nu 3, o lea ua Nu 4 ina ua suia ai o le Tulafono. Ia toe fefulisai le magalafu toe ula le asu, ligi le koko, aua o lea o le a ta le ofeloa aua ua mamalu le taufaanuu i lenei taeao.

Lau Afioga i le Fofoga Fetalai ma le mamalu o le Maota, ua ou tulai atu ma le faaalalo e amatalia le tali a le Malo. O le lala maoti lenei o fesootaiga ma faamatalaga faatekonolosi. E fai ai ma sui, o lea e afio atu le Minisita lagolago aemaise i Matagaluega e 3, o le Matagaluega o Fesootaiga, o le Pule faatonu ma le Falemeli. E momoli atu se tali i lenei taeao aua manaoga faaalua ma nisi foi o itu na tuualalo mai ai.

Ae ou te le i see i le tulaga lea, o le manulauti ma le faavae o a matou galuega, o le ola fiafia ma le ola loto mama. Faavaeina lea i Afioga a le Atua i le tusi o Faataoto 17 f 22. O le loto fiafia o le vailaau sili lena. A o Afioga

a Iesu na lauga ai i luga o le mauga. Amuia e loto mama aua latou te iloa atu le Atua, e faapena le siosiomaga o lo o galulue ai lenei lala tumaoti. O le lagona fiafia o ia te au, le Minisita lagolago ma i matou o lo o faapena ona faatautaia lenei lala, ia faapena foi ona oo atu i le au faigaluega. Ona maua ai lea o se siosiomaga fiafia ma tele galuega lelei e faia mo le Malo e mapuna mai ai. O upu lava a se tasi o fatuga matagofie i totonu o lo tatou atunuu, e ta te maona fua i lou laufofoga fiafia mai.

O le ala foi lea e tou te silasila mai ai ia i maua ma le Afioga i le Minisita Lagolago, ia ma Ofisa Sili, e le gata e ola fiafia, mata ataata, ae tumau pea le laiti. Amuia foi au ua ou maua se Minisita Lagolago faapena e sili ona atamai, galue malosi i le ao ma le po atoa, e tuualalo mai, e tau faaoso, i mea lelei. Ae po o fea foi ou te fealuai ai ou te popole ai.

O lou malosi e maua mai i le Atua ma maua mai i ou tua, tino laulaua, leo pau, e matua fefefe tagata e faalogo ai. O le mea lea, alo maia, o nisi o mataupu sa faapena ona laga i a outou saunoaga.

Tofa Lealailepule Rimoni Aiafi (Faleata Sisifo): Lau Afioga i le Fofoga o le Fono...

FOFOGA FETALAI: Ia se i tulai mai la lau Minisita Lagolago.

Tofa Lealailepule Rimoni Aiafi: Se ua manaia lava ia lenei taeao. E ui foi ina i ai nai vesiga laitiiti, ia o mea ua masani ai le tatou Fono.

Ae ua ou tulai atu i le Afioga o le Minisita, sa fai lau tala i lou atalii, na vili mai i le Aso Faraile, 'dad na ou alu atu nei i le Bank e fai lau loan, na ou alu atu e fai lau loan i le Samoa Commercial Bank, na ou fai atu i le tama i sau loan, ae fai mai le tamaloa e le mafai. Seiloga e sue mai se isi e guarantee ia lau loan.

O ai le igoa o lou tama?' Tau loa i ai e le tamaititi le igoa o lona tama. Nofu loa ma le tama, oi sole. Matautia le tagata. Ia alu atu loa lou atalii i le fale, fai mai, 'e te iloa oe dad, matautia le mea lea e i ai oe. E a? Po o fea ou te alu i ai e talanoa tagata ia oe. Ou te alu atu foi e fai lau loan, fai mai le tamaloa lea e le manaomia se guarantee. Na o lou fai lava i lou tama e vili mai, maua lau loan. O lea la ua ou sau, dad e na o lou vili lava i o, maua lau loan'.

Ou fai atu loa vaai oe son, ou te ala mai loa i le taeao, sue se tasi ou te faaseea. Na ou aoa nei e oe e te alu e faasee isi tagata, ae o lea ua e toe sau faasee lou tama.

Lau Afioga i le Minisita, ua matua leva ona ta mafuta ae o lea faatoa e faaseea lea o au. Faafetai lava i lau Afioga.

Afioga Hon AFAMASAGA LEPUAI RICO TUPAI: O uiga malie na o le Afioga i le Minisita Lagolago lena e tou te talie ai.

FOFOGA FETALAI: Tulai maia e faaauau le saunoaga, aua o uiga lava ia e toe ulu lava e lau tama oe.

Afioga Hon AFAMASAGA LEPUIAI RICO TUPAI: E le toe tau faamatala le tulaga ua i ai nei le lalolagi ma le faamai. O mea uma ua agai i ai, ia ua tua lava i le initaneti ma telefoni. Ua le toe i ai ni malaga e tou te faimalaga ai i fonotaga i fafo, ae o lea lava ua fono atu i inei, i tulaga televavae ua oo i ai initaneti ma fesootaiga. Ae o le tele foi o fono, ia ua sili atu la le fono lenei na i lo le fono lea e masani ona faimalaga ai.

E le gata i lea o fonotaga a aiga, o feiloaiga ma fanau i atunuu i fafo, ua tele lava ina outou faaaogaina ia le video i luga o le telefoni ma le initaneti. O Samoa nei lava ia, malolo aoga, ia o le initaneti lava sa faaoga ma telefoni feaveai. E faatino ai aoga aemaise lava i luga o le TV.

E le gata i lea, e malolo foi le afaigaluega a le Malo i nisi o maota ma laoa e galulue mai ai, e le i motu lava. Ma e le i faamutaina foi ma afaina ai galuega fai aua le tautuaina o le atunuu, ona o lo o tua lava i le initaneti, ia ma le telefoni.

O nei mea uma mo lo outou silafia, o le mea moni ana le taunuu mai le tatou uaea lea o le Tuisamoa, e matua ona faataunuuina nei mea uma. Ia ma ua talafeuga i le 2018 i le masina o Fepuari, na taunuu mai ai ia le tatou uaea ae ua tutupu mai nei faalavelave, ia ae o lea ua alu i le atoa ia lona faaaogaina.

Ua soo lo tatou atunuu i le telefoni ma le initaneti, o le mea moni lea e faailoa atu. E moni e i ai ia vaega e le ola ai le Vodafone, ae o lo o ola ai ia le Digicel. E i ai vaega e le ola ai le Digicel, ae o lo o ola ai foi ia le Vodafone ia ma le Netvo. O nai kamupani nei o lo o faapena ona tautuaina ia tatou i luga o le initaneti ma le telefoni.

O le tau o le initaneti a tatou lea ua i ai, ua sili ona taugofie. Mai i le 2018 ina ua tatala le tatou Tuisamoa, ua matua pau lava ia le tau o fesootaiga i le 80 %. O faamaumauga ia, ia ma numera ia o lo o faapena ona faamaumau pea e le Ofisa.

A e malaga i Niu Sila i le taimi nei, e te alu atu faatau ia lau SIM Card \$49.00 e na o le 4 ia au Gigabytes e mafai ona maua ai. Ae e malaga mai i Samoa nei, e faatau ia lau SIM Card \$20.00 ae e 10 au GB e maua ai. O se fua lena e tatou te tilotilo i ai mo le faaaogaina o le initaneti i lenei taimi. A outou silasila foi i ai i le tele o faalauiloa talu ai nei lava, o le isi mea e 58 GB, 100 GB le isi kamupani. O le taugofie lena, ua i ai le tatou initaneti i lenei taimi mo lo outou silafia. Ne i outou faapea o le taugata ona o la outou tupe alu, ia ae o le faatusatusa i isi atunuu, o lo o ua i ai i le taimi nei, o lo o sili ona taugofie Samoa i totonu o le Pasefika.

O le SchoolNet, ia o se taimi foi tali atu lea o le Afioga i le Minisita o Aoga, o lo o i ai tonu ia le matafaioi. Ae ou te talanoa atu au ia i le connectivity ma

fesootaiga, ia ma aoga ua mafai ona faamauina ua i totonu o lenei foi atinae, ua ova i le 200 aoga i Upolu ma Savaii ua faapipiina ma ua connect mai e ala i luga o le Samoa National broadband i totonu o le tatou SchoolNet. Ia ma ua faaaogaina foi e le tele o aoga i a latou sailiiliga ma aoga. Sei vagana nai aoga e le o lava masini, po ua faaleagaina foi masini, ia o aoga la na o lo o toe taumafai e toe tau faalelei.

Ae o se tasi o toatuga o lo o faafeagai pea ma le Matagaluega, aemaise foi le Matagaluega o Aoga, ia ona o nai faiaoga ua matutua. Ua faigata i ai latou ona toe agai i totonu o sailiiliga nei faa-komipiuta ma faa-itaneti, ia aua aoaoga a fanau.

O le taimi lenei o le faamai sa i ai, ia sa faaaoga e le tele o fanau ia a tatou telefoni. Ua le gata la ua faaaoga telefoni, a ua le toe agai mai i ogatotonu o el SchoolNet, ae ua agai sao lava i o i Amerika i le mea o i ai le Google. Ia ma isi polokalame faapitoa, o lo o i ai ia le miliona ma miliona o tusi faitau, o tusi aoga aemaise lena, o le tele o faamalamalama o aoaoga eseese.

E malie ai se tasi o polokalame a le Ofisa o Aoga o lo o sau pea i luga o le TV i lenei taimi i le faatalatalanoaga o le fanau i le faaaogaina o le initaneti, matua fiafia le fanau ma latou faamatalaina ia le lelei ma le vave, saosaoa o le initaneti, ia aemaise ai SIM o lo o latou faaaogaina e faaaoga fua mai le Vodafone ma le Digicel, ona faapea ai lea o tala a tamaiti i le faaiuga, ia o mea la ia e leiloa e le faiaoga ae e iloa e matou. Ia ou te manatu, o lo o taumafai pea ia le aoaoga o nai faiaoga, ina ia faapena ona faavavevave i luma ia o faatasi ma le tulaga ua vave ai nei le malamalamaaga o le fanau.

O le faaaogaina foi o le telefoni, ia e tele ina maua e nisi o sui usufono e le mananao e soona i le fanau. Ia ae o lau talosaga, tuu le telefoni i tamaiti e taaalo ai. E i ai vaega na e maua pe a taaalo e le o mafai ona maua i totonu o le potu aoga. Credit thinking ma le critical thinking a tamaiti e aoao ai, sei vagana o le galuega a le matua, ina ia faapena ona lava le taimi, e faamuta, ma ia i ai taimi e tuu i ai e na o le pau lava lena o le taimi e tago ai i le telefoni, ia ona toe foi lea e fai ana meaaoga ae aua le tuusaunoaina. O le tatou galuega la lea e faia i totonu o aiga.

O le tatou SNBH, o lea ua outou faaaoga ua matua tele aoga o faaaogaina ia le SNBH. O lea foi e fai ai aoaoga i le taimi nei a faiaoga, faiaoga i Savaii, faiaoga i Upolu o lo o faapena ona fai atu lava i Apia ia le latou aoga, ia ma le latou training i luga o le tatou Samoa National Broadband. E faapea foi i falemai, sei vagana ai o lea faatoa taunuu mai masini, ona sa fai si tuai mai, ona o le tulaga o le faamai. Ia o le ala lea ua taunuu mai la ia masini i le taimi nei, ia ua lata mai le taimi e agai ai e faapipii, ia ona amata ai lea o le tulaga na talanoaina ia ia togafitiga.

Tofa Olo Fiti Afoa Vaai: Lau Afioga i le Fofoga Fetalai, sina mea lava lea e faamalamalama...

FOFOGA FETALAI: Faamalie atu i le Minisita, se i tulai mai ia le sui usufono o Salega...

Tofa Olo Fiti Afoa Vaai: Ia faafetai mo le avanoa, faamalulu atu i le Afioga i le Minisita, leai ua manaia ma matagofie le folasaga. I le tulaga la lea o le fesootaiga ma le tulaga la lea i le faaogaina o le SchoolNet ma le SNBH mo fonotaga, leai ou te molimau atu lau Afioga i le Fofoga Fetalai ina ne i te i ua ou faapea ua, o le matou aoga Primary School e oo lava i le Kolisi e le o i ai se tulaga faapea.

Lua nei vaiaso talu ona ou foi mai i Savaii sa ou alu foi ou te suesue i le vaega lea, e na o le lua lava ia aoga la e ola ia mo le internet. O le tele o aoga, o la e i ai ia masini, ae e le o pipii i ai se uaea, i le tulaga o le ae manaia ia o le mea lea ma ou te le i faalogo lava ua ia ua fai se fonotaga a faiaoga i luga o le mea lea. E pei o le tulaga lena ma lona taua lena.

Ia ou te talitonu lava a faapea o i ai se sui usufono mamalu po o se sui usufono o lenei Maota e faasao o la e ola se initaneti i a latou Aoga Tulagalua. Ia ou te iloa o le molimau lena. Ae o lau molimau atu lena se i silasila, toe silasila ane pe i ai se tulaga faapena ma le agaga faaaloalo.

FOFOGA FETALAI: Malo, faafetai o lea ua maua atu le faasaoga.

Afioga Tafua Maluelue Tafua (Aleipata Itupa i Lalo): Lau Afioga i le Fofoga o le Fono...

FOFOGA FETALAI: Malie le Minisita se i tulai mai le sui usufono o Aleipata Itupa i Lalo.

Afioga Tafua Maluelue Tafua: Ua maua foi se avanoa lau Afioga ou te faavii ai i le Afioga ai i le Minisita ma le faafetai sa ou faafetai e le gata i le matou TV, ia ae faapena foi ma le aoga. Ona pau lau fesili ma le faaaloalo se meamanu ua maua si ou avanoa e mulimuli atu ai, sa e taua le 200 aoga lea e maua ia le SchoolNet. E le gata i lena ae faapea foi faiaoga. Ia atonu se i saunoa mai le Minisita pe a oo i lona taimi, e tali mai ai le fesili lea, o le fesiligia pe o i ai se aotauina o faiaoga i le SchoolNet? e le gata i lea o le SNBH.

Ia o la matou asiasiga leaga e matou te Komiti faatasi ma Olo. Talu ai la o le falemai, o lea e fai ia le mea lena o le SNBH, ae sa o matou o i Motootua o le tala a le fomai ua fai si leva ua tausaga ma le afa i le 2 tausaga talu ai. O lana tali e faaletonu lava latou i mea tau knowledge e le o lelei latou o lona uiga e manaomia se refresher course foi lea i atunuu la pe tali mai le Afioga i le Minisita o Falemai, e le o lelei tele ia le faatinoga o le galuega i Safotu i lona nuu, e le ola se mea, e le ola se mea e tasi.

Ae o le mea la lena lea ou te fesili atu ai, o lau fesili mo le lumanai ma le sologa lelei o la tatou galuega, e matua lelei lava i le taimi nei, e pau o le mea pe o i ai se aoga po o se capacity building course mo faiaoga atoa ai ma fomai ma le faaaloalo.

FOFOGA FETALAI: Malo faafetai, tulai mai le Minisita.

Afioga Hon AFAMASAGA LEPUIAI RICO TUPAI: Ia faafetai i finagalo faaalua o sui usufono mamalu o lea ua faamauina, i le tulaga ia maunua ai e toe alu se asiasiga e toe siaki pe a faapea e le o ola mai ia fesootaiga i aoga ma falemai.

Ae e le manaomia ia se initaneti e ola ai le SchoolNet. O le SchoolNet lava ia e ola mai i luga o le National Broadband ae o lea lava o le a toe faagasolo i se taimi lata mai o lea ua faamauina foi ia lua finagalo.

O falemai, o lea ua outou faafofoga mai o lea faatoa taunuu mai masini. Ia o le a faaalu loa la masini i tua, ia faatasi ai ma aoga e le gata e aoaoina ai latou i tua, ae faapea ona aoaoina ai faiaoga o lo o faapena ona i le tulaga o le aoaoina o faiaoga se i i ai se taimi, ia ona toe faalauaitete atili lea e le Afioga i le Minisita o Aoga ia le tulaga o lo o i ai i ia foi taumafaiga.

O le tatou TV, ua oo atu i le 85 % le vaega o Samoa ua faasopolia i le auunaga o le tatou Digital TV i le taimi nei. O se taimi o le faaiuga o le masina nei e taunuu mai ai masini e faa-atoatoa ai tatou faasalalaua i le atunuu atoa, ia ma ua i ai foi ia le mafauauga ma ua tau tilotilo foi le Matagaluega aemaise le Pule Faatonu. Afai e taunuu mai masini nei ma faapipi i le faaiuga o le masina po o le amataga o Iulai, ia ona tilotilo loa lea po o le faaiuga o Iulai, ia o le a tape ai loa faasalalaua tuai po o le tatou Analogue System, lea sa faaogaina ma o lo o i ai pea nai televise o lo o faaogaina pea i le taimi nei.

Pau le mea, afai o silasila ma maimoa mai i lena Fonotaga, afai e le o manino lelei ia lau TV, ia faatau atu sau pusa i faleoloa i Apia i le SSAB o le Bluebird ia o latou nei e faatauina pusa, ia e te alu atu lava e faasino lelei ia oe le faapipiina. E le gata i lea, faatau sau antenna i fafo. Afai lava o lena e te ola i i le antenna i totonu o le fale i le taimi lena, e tele le avanoa e te faaogaina ai lava le antenna lena. Ae afai o le antenna i fafo, e le o toe tu sao faapea i luga, o la ua faalava. E le o toe vertical, a ua horizontal. Ia ma o se faamalamalama laititi lea, ia ae o lo o i ai le taimi faatulagaina o le a agai atu i ai i tua ia le Ofisa ma le Matagaluega, fesoasoani mai foi le Samoa IT Association, ia e faagasolo galuega i tua ma faamalamalama, ia ma lau le pusa ia faapena ona faapipi i totonu o aiga ma maota ma laoa e maimoa mai i ai.

O se avanoa foi lena e momoli ai le faafetai tele i paaga a lena lala tumaoti, o kamupani ma telefoni, ma kamupani fai TV, ia ae le gata foi i lea o nai paaga mai fafo o lo o fesoasoani mai pea i lena matafaioi, ia ma ua

faatelelelevave ai le atinae ma agai ai i luma taumafaiga i lea taimi i lea taimi.

Lau Afioga i le Fofoga Fetalai o se tasi o mataupu laga pea ma o lea sa outou faafofoga ai i le taeao i faamalamalama Faa-Minisita i le saunoaga Faaminisita a le Palemia, ia o le tulaga lea i le faatauina o le Samoa Tel. O le Samoa Tel i lona faatauina i le 2011 e le i faia na o le Malo. Sa fai faatasi ma le Faletupe o le Lalolagi, Konesale o le Faletupe o le Lalolagi, sa galulue ma le Malo, ina ia faatulaga le faatauina o le SamoaTel.

E faatau le SamoaTel i lea taimi, e le i i ai se auauanga faatelefoni feaveai. E na o le auauanga e tau o le homezone. Ou te manatua pea ia le faapiiina o le nuu muamua lava o le nuu muamua lava o Gataivai fai i Savaii sa o le Samoa Tel faapiii ai muamua lava le homezone. Ia na matua fai faafiafiaga, fai taiga sua, momoli foi le meaalofa i le nuu a le SamoaTel. O le foi mai o le SamoaTel i Upolu, ae ua agai nai toeaiina e mimita ai i Salelologa, ae ki atu e le ola. E vili mai i le SamoaTel ae faamalamalama atu e Ofoia, e faamalulu atu, e na o Gataivai lava e ola ai ia a outou telefoni. O le malosi lena o le system sa i ai i le taimi lena a le SamoaTel i le taimi na faatau ai.

E leai se telefoni feaveai sa faia. O le malosiaga e na o le 2, 2G. Ia, ona faatauina lea i lea taimi, o le tau sa outou faafofoga i ai, e na o le 75% o le tau o le kamupani, ona o lea ua outou maua, e 25% sa tuuina atu i le UTOS mo na i o tatou tagata.

I le taimi lena ina ua toe faatauina ia le Bluesky i le 2017, ia ua tele faaopoopoga. O le mea muamua, e le na o le Bluesky sa faatau ai i ina. Na faatau ai i le tau lena le Bluesky i Tutuila Amerika Samoa, ma faatau ai i le Bluesky i le Atu Kuki Cook Islands i le tau lena. Ae o Samoa lava ia, e faatau ane le Kamupani i le taimi lena, ia ua oo le malosiaga i le 4, 4G. Ua faaopoopoina foi pou ua oo pou mai le 54 pou sa faatau ese ai, i le 90 ma ona tupu pou ua i ai nei. A ua le gata la i lea ua outou faafofoga mai i le 2 agai i le 4, o lona uiga ua toe fesui ai uma lava antenna ma mea uma, aemaise o totonu o Ofisa ua toe sui ia le malosiaga.

O le taimi lena, afai o faaletonu ia le tou auauanga i le taimi o le Vodafone, o lea la ua amata ona toe test ia fesui ai ma le upgrade, ina ua uma ona faatauina ia e le kamupani a le Vodafone, i le Bluesky i le tausaga e 2017 lea faatoa faamaea i le tausaga ua mavae.

Ae o lea foi ua outou faafofoga i le mafuaaga ma le silasila mamao a le Malo na faatuina ai le UTOS. O le UTOS, o se avanoa e fai share ai ia nai o tatou tagata e le faigaluega. O le NPF, e agai i ai le aufaigaluega. O le avanoa lea na maua i i sa le gata sa 25% le UTOS i totonu o le Bluesky, ae na fai share ai foi le UTOS i le Bluesky Pacific, lea na o atu faavae le Bluesky i le Atu Kuki. O lea la e i ai le UTOS Samoa, ia e faapea foi ona i ai ona share i totonu o le Bluesky Pacific ma le Bluesky lea i le Atu Kuki.

Ae o le faatauina e le Kamupani lea o le ATH lea na toe faatau ese mai le Bluesky, ua maua ai ma le avanoa o le UTOS, e fai paaga ai ma le ATH, o

le taimi la lenei mo le silafia e le Palemene, o la foi la ua fai share a le UTOS i le kamupani a le ATH i Fiti. Ae e le gata i lenei, o lea ua o atu ai ma le NPF, e fai faatasi ai ma o latou share, i lenei kamupani tele.

O le Kamupani a le ATH mo lo outou silafia....

Tofa Olo Fiti Afoa Vaai: Lau Afioga i le Fofoga Fetalai, malie lau Afioga pe maua sina avanoa lea, ona o lea sa ou taua ia le...

FOFOGA FETALAI: Sa e taua i lau lauga...

Tofa Olo Fiti Afoa Vaai: Ia se i fai se malologa a le Afioga i le Minisita...

FOFOGA FETALAI: Saunoa le sui usufono.

Tofa Olo Fiti Afoa Vaai: Faafetai i le avanoa i lau Afioga leai o le tulaga taua sa tuuina atu foi i le mataupu lea i le faatauina foi o le SamoaTel, lelei. Afai o fuafuaga na sa faatino e le Malo, lelei. Na pau lava le mea i lau mataupu atu i le Tala o le Tupe o le SamoaTel i le 2009, ia ma tua atu, ia na oo nai a tatou seleni agai i le \$10 ma ona tupu miliona i le tausaga i le tulaga. O le taimi lenei, ina ua ua oo e amata mai i le Bluesky, a maua ia nai o tatou dividend i le mea lea e i ai, e na o le tai miliona tai 2 miliona.

O le tulaga foi i le tuuina atu ma le faamoemoe o le Malo i le tuuina atu o le faatauina atu o le SamoaTel po o le Telecom foi i lenei taimi, e faapea e le o i ai se expertise, leai se knowledge a tatou. Ae silasila lau Afioga i le Fofoga Fetalai ma le mamalu o le Maota ma le molimau mai foi ma le faafogafoga a le atunuu, o Samoa uma lava la e i totonu la e faatinoina ia galuega a le Vodafone i le taimi lenei, amata mai lava i le Bluesky. O Samoa uma la e hire ai e leai lava ma ni tagata faapea na tau hire e leai so latou malamalama. E oo foi i le Digicel, o Samoa uma.

O le mea lenei sa avatu ai se lagona i le taimi lenei, ona o le tele o le aseta lea ma tau o aseta. Ma silasila foi lau Afioga, faatoa uma foi i ina ia ona faataoto le tatou fibre objects. O le taugata foi o lenei mea toetiiti \$40 miliona na fai ai lenei atinae. Ae pei na faigofie, o le mea la lea na avatu ai o le tau na faatau ese ai \$11 miliona a...

FOFOGA FETALAI: O lea ua manino le saunoaga...

Tofa Olo Fiti Afoa Vaai: E faafesili atu ai la, e toe tasi lava lea lau Afioga, o le infrastructure lea e i ai, se i faamanino mai lava e lau Afioga i le Minisita po o le mea o lea e faatau atoa atu ai ma mea na? Po o lea e lisi ai le Vodafone? Ma le faaaloalo, faafetai.

FOFOGA FETALAI: Ia malo, se i tulai mai le Minisita.

Afioga Hon AFAMASAGA LEPUIAI RICO TUPAI: Ia, faafetai foi i le sui usufono mamalu i le fesiligia o tulaga ia. Ae mo le faafofogaaga a le atunuu, ia o lenei auaunaga, e itiiti faapenei le tupe maua, ae e tele faapea le tupe alu. O le tulaga la lea e le o maua mai, ona e faitau miliona miliona tupe alu, ia ae itiiti lava se tupe e maua ai mai le amataga o le auaunaga.

I lenei la taimi, pe oo i le \$10 miliona ia tupe alu, ia ae tele ia le tupe faaalu sa i ai. O le tulaga la lea ua i ai nei lau Afioga, e pei ona faafofoga i ai i le lauga Faa-Minisita a le Palemia, i mafuaaga na ala ai ona faamatu e le Malo nei auaunaga. O lea la tou te faafofoga mai, e na o le pau le mea na mafai ona fai e tatou, o le homezone i lenei taimi.

Ae o le a le mea lea ua i ai? Ua tutusa Samoa ma le lalolagi atoa i lenei auaunaga, ana le faia le mea lea e le Malo lau Afioga, e le vave ona oo i le tulaga lea. O le mea moni lea lau Afioga ou te tau atu. O le Digicel na amata i le 2006, ia o lea ua matua masau. E amata atu lava i Samoa nei alu atu i le Pasefika. Ae e faamanatu atu foi mo le silafia e le Palemene nei, o le Digicel, e 20 % la e i ai totonu share a le Malo, e tauala atu i le NPF ma tagata faigaluega a le CSL.

Lau Afioga i le Fofoga Fetalai, o le lagona ma se fesili e tuu mai ma se faaaliga e faapea e tatou te aumaia i totonu e tatou te toe faatau mai, it's a liability, o le mea moni lava lea. E na o tupe alu lava. A lea ua saunoa ia afioga i sui usufono mamalu. O la ua faigaluega ia o tatou tagata. O le mea taua lenei i le Malo. Toetiiti lava aufaigaluega atoa, sei vagana lava ia le pito i luga ma nai nisi o avanoa, e omai mai fafo. Ao tatou tagata la e faigaluega, o le mea taua lenei i le Malo. E faasopolia galuega i nai o tatou tagata.

A o la foi mai le tausaga e 2011 sa faatau ese ai...

Tofa Olo Fiti Afoa Vaai: Lau Afioga i le Fofoga Fetalai o le mea e fia faasao lau Afioga...

FOFOGA FETALAI: Ia, se i...

Tofa Olo Fiti Afoa Vaai: Leai e faamalulu atu i lau Afioga i le Minisita, leai e matou te le o mananao e toe aumai le Bluesky po o le Samoa Tel po o le a. Na pau lava le mea lea na avatu ai le fautuaga, o le toe toso mai o le gateway i totonu ma le vaaiga a lo tatou Malo. E pau lava lenei. Ae o le faataatiaga ia o le pisinisi i le Digicel ma le Vodafone, taoto ai lea faapena, ma le agaga faaaloalo.

FOFOGA FETALAI: Se i tulai mai le Minisita.

Afioga Hon AFAMASAGA LEPUIAI RICO TUPAI: Malo faafetai. Ua 3 gateways a tatou lau Afioga. O lea e alu i le satellite, ia ma alu foi i uaea o

fesootaiga e agai i le uaea lea i Tutuila, o le Samoa American Samoa ia ma le American Samoa Hawaii la e alu atu ai le gateway a tatou. O le isi lea tatou gateway lea ua alu i luga o le Tuisamoa.

Ae o nei gateway ia po o nei foi faitotoa o fesootaiga i fafo, e le mafai ona o tatou o atu lava fai, faaaoga. E i ai aiaiga a le Malo o Amerika, le FCC e pasia aloaia ai mea nei faatoa mafai lea ona faaaogaina. I le alu i fafo ma le sau i totonu, e tele puipuiga e i ai, e tele ia tulaga e faatulagaina ina ia mafai ona tatou ausia, ia ona faatoa mafai lea ona faataga mai tatou e tatou te faaaogaina. Ia ae o le taimi lenei e pei ona ou faamalamalamaina atu, o tulaga tau faiga share lea e i totonu o le ATH ia le tatou kamupani o le tatou UTOS ia faapea foi i le NPF.

Ia e le gata la i lena, o lea faigapaaga, ua amata ona sosolo atu i isi atunuu o le Pasefika, ia ma la ua o o atu ai lava ma tatou tagata. Afai la tou te toe maua mai ma faamanatu ma toe faafofoga i le mafuaaga na faatulaga ai le UTOS, ia e fai sea ai nai toeaia ma nai loomatutua i nuu i tua.

Susuga Hon Laauli Polataivao Leuatea: Lau Afioga i le Fofoga Fetalai, manatu o lea o le a see ese ia le Afioga i le Minisita ma le...

FOFOGA FETALAI: Malie le Minisita...

Susuga Hon Laauli Polataivao Leuatea: Faafetai mo le avanoa, manatu o lea o le a see ese le saunoaga a le Afioga i le Minisita ma le mataupu lea o le gateway leaga o lea foi sa ou laga. O le a le toe oo sou leo i le tulaga o le tau, faamasino Samoa. O le a le tulaga lea e i ai le tau o le tatou internet? Ia ma le slow la e i ai. E le toe oo sou leo, e le faataumatatao foi i lau saunoaga, faamasino le atunuu po o le a le mea la e i ai.

E le toe oo foi sou leo i le tulaga i le faatuga o le tatou Samoa Tel Bluesky. E matauina, e ova atu ma le \$200 miliona, le polofiti na maua. O le mea lea ua ou agai atu ai i le gateway, malie lau Afioga Afamasaga, o le cyber security o le atunuu. O le puipuiga o tatou faamaumauga mai gateway nei. O lea ua e saunoa malamalama, o le ATH a Fiti, e pulea le Vodafone, 60% o le latou share. E i ai le tulaga maaleale, latou te hack ina uma ai ia tatou information. O le malu lena o le atunuu, lea ou te talosaga atu ai, silasila mamao lau Afioga.

E le o control ina uma e Samoa gateways nei e 3. Pule lava ia le Digicel i le latou gateway, pule le Vodafone i le latou gateway, faapea foi le Netvo ma le latou gateway. Ae o le popolega lea e i ai, ia o le cyber security o le atunuu. Government entity, o tatou faamaumauga uma nei. O lea e lele i le vaomaoa, e le o i ai se malupuipua, ia aua e la e mataitu uma tulou, le lalolagi i a tatou mea ia e fai.

FOFOGA FETALAI: Ia o lea ua maua le saunoaga a le sui usufono...

Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: Lau Afioga i le Fofoga Fetalai...

Susuga Hon Laauli Polataivao Leuatea: O lea e alu atu ia le tatou cable connect i Fiti, e matamata uma Fiti.

FOFOGA FETALAI: Tulai mai le Palemia e fesoasoani e tau faamalamalama le mataupu lea.

Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: I le 3 ea tausaga talu ai, sa faia ai le faasalalauga a se tasi foi i Niu Sila ea, nofo ma hack ia nisi o faasalalauga. Ia ma faapea mai, ia talofa e ua iloa uma e le lalolagi ia fesootaiga ia e fai a Niu Sila ma Samoa. Sa fesiligia ai au.

E faamata o le a le aafia o tatou? Ia ona ou fai atu laia lea, masalo po o ai lava le palagi e sipai mai ia tatou, ia na o le pau lava lea masalo pe o le 99% o ota tagi, se aumai lava se \$1,000 se i fai ai lou alofa. Se aumai lava se mea na e faatau ai au tapaa. Se aumai lava se mea na e fai ai le alofa, e fai ai le oti.

Ia o lona uiga, e matua tiga ulu o tagata e faalogologo fua i a tatou talanoaga o tatou lava mea. Aemaise o la e talanoa atu le toaina i fafo i le gagana Samoa. E na o sina mea faapena. Ia ona uma ai lava lea.

Lau Afioga i le Fofoga Fetalai, taatia ia o la e, o mea nei e talanoa mai ai, se o mea ua leva ona foi mai ai le tatou Malo, e leai se mea e popole ai i ina mea.

FOFOGA FETALAI: Ia, malo. Ia o lea ua faamanino ia le...

Susuga Hon Laauli Polataivao Leuatea: O lea e faauma atu ai le lagona lau Afioga, e le o se isi lava itu lau Afioga i le Fofoga Fetalai, e le o se isi lava itu. E le o se isi lava itu, malie Afamasaga, e feoloolo le folafola o le lua loto mama ma lau Minisita Lagolago i le mea lea e taumafai atu. O ula ma laei mo lou tulai mai.

FOFOGA FETALAI: O lea ua maua atu...

Susuga Hon Laauli Polataivao Leuatea: Ia ma o le agaga lena, e le o malupuipua a tatou faamaumauga i faamatalaga ave, o la e silasila uma lava Fiti ma Panimarama i a tatou mea ia e fai, o le agaga lena o lea e popole ai.

FOFOGA FETALAI: Malie le sui usufono... Ia, ailoga lava e fia talanoa o i a tatou palota pe a talanoa i na mea? Ia se i saunoa mai le Minisita, aua o lea ua faamanino atu e le Palemia e leai se mea o le a faapopoleina ai le tulaga o le tatou atunuu i lea tulaga, ae se i saunoa mai le Minisita.

Afioga Hon AFAMASAGA LEPUIAI RICO TUPAI: Lau Afioga, faafetai i le tulaga o lo o laga, ae ou te faamanino atu e le faamaonia ia saunoaga, o lo o malupuipua a tatou faamaumauga, ma o itu uma ia sa silasila i ai le Malo i le amataga i le faatauina o tatou uaea ma fesootaiga. E pei ona ou fai atu i taimi ua mavae, e le alu tatou fesootaiga i totonu o Fiti, na o le oso atu lava i autafa o Fiti faapipii i le uaea mai Ausetalia o loa. A o le uaea le la mai Ausetalia, e i ai foi le isi ona lala e alu i totonu o Fiti. Ae afai la o lea tatou te talanoa o lea e matamata Fiti ia tatou ae le o alu le tatou uaea i Fiti, a o la e alu le uaea a Ausetalia i Fiti, ia o itu la na e tataua ona outou silasila i ai, o la e malupuipua fesootaiga, e leai sea mea faapea o faalogologo Fiti i a tatou fesootaiga. E leai, o lo o lelei le faatulaga foi i le taimi lenei le tatou cyber security lea ua galulue ma Ausetalia o lea ua fesoasoani mai Ausetalia o le a faatu le tatou research i le taimi lenei.

FOFOGA FETALAI: Malo. Malie lau Afioga i le sui usufono...

Susuga Hon Laauli Polataivao Leuatea: Ioe lau Afioga i le Fofoga Fetalai na ona tatalogo atu lava Masefau, e leai lava se agaga.

FOFOGA FETALAI: Malie le sui usufono...

Susuga Hon Laauli Polataivao Leuatea: Faamolemole le Minisita, faatu se tatou Tulafono e pupui ai tatou mea, aua e leai se tatou mea o i ai, we have nothing to protect our communication, nothing. O le agaga lena, fai se Tulafono o le tatou cyber security mo Samoa. O le tatalo lena ma le tuualalo lena, o le tuualalo alofa mo oe ma le atunuu.

FOFOGA FETALAI: Ia, o mea nei o finauga i finagalo lagalaga, ou te faamalulu atu i sui usufono mamalu, aua foi lou naunau tele i le tulaga ina ia toso atu le finagalo ma le faamalamalamaga a le Malo i lou finagalo. Afai o lou finagalo lea o la ua tali le Malo, o lena. Ae le faapea o le a e faatonuina atua le Malo o le mea lea e tataua ona fai, e tataua ona fai. E fia selau foi o latou, le au popoto ma le au atamamai o la e foi e faagasolo le tulaga o le galuega, ae aoga fautuaga e taatia atu fautuaga. Ae le aoga ona faapea, ia outou o e fai le mea lea ma lea, ia o lou lava lena finagalo.

E faamalulu atu i le sui usufono mamalu leaga e...

Susuga Hon Laauli Leuatea Polataivao: Ioe, malie lava Toleafoa e leai lava se agaga ia te au ou te faatonuina le Malo, e mamao le agaga lea ma au, o le tuualalo lea e avatu. E leai se agaga e leai foi se agatonu, leai. O le tuualalo alofa.

FOFOGA FETALAI: Malo faafetai. Ia taatia atu i ina le fautuaga. Ia se i...

Tofa Olo Fiti Afoa Vaai: Lau Afioga i le Fofoga Fetalai mo le faasaoina o le saunoaga a le...

FOFOGA FETALAI: Malie, ia, se i tulai mai lava le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, ia a aumai na alofa e faafetaui ma nei alofa? Faapea o faia ni mea i se le alofa? O lea foi o lo o i ai i totonu tagata e mamao atu lo latou malamalama ia te oulua lena e te lua tutu soo mai luga. Ae taatia pea o la e fai le latou galuega. E leai se mea e faapopoleina ai, o le mea ia o le tuualalo, a aumai loa le lua manatu, taatia mai i i, o le final say le Malo. Na ona ou faapea atu, a oulua tutu i luga faa-afe, e tutu i luga faa-afe ma le tasi. A fai atu loa le tonu a le Malo ona gauai mai lea ae tuu mai le lua fautuaga se i tilotilo i ai pe i ai se aoga.

FOFOGA FETALAI: Malo. Malie le sui usufono mo Salega, o le a le faamalieina lou finagalo i lou tulai mai, tatou o i le mea lea e manatu le Nofoa e maua ai lo tatou galulue faatasi. O lea ua faaila lo outou finagalo, ia taoto mai laia tuu mai laia i le Malo o la ua Ioe, se i tulai mai le Minisita, faamau ifo manatu o tama ia na tulai mai.

Tofa Olo Fiti Afoa Vaai: Lau Afioga i le Fofoga Fetalai, ona o lea ua see ese le Afioga i le Minisita e le i talia maia lata fesili. Po o aofia le infrastructure i le tau lea ua faatau atu ai le tatou BlueSky. Na o le pau lava lena o le mea leaga o lea o le a see ese le Afioga i le Minisita ae po o i ai le vaega lea. Faafetai.

FOFOGA FETALAI: Ia lelei se i tulai mai... E faapea ua uma ona tali... Se i...

Afioga Hon AFAMASAGA LEPUIAI RICO TUPAI: E le i uma le tali, o lea lava e faasolosolo i ai, e oo lava i ai lau Afioga. Ae faamanatu atu foi o le lala lena o laua mea ia e i ai. A tatou talanoa loa i le mea lea o le cyber security lau Afioga, e le na o outou o outou finagalo ia aua ne i faalogo nisi

i a outou talanoaga, o lea foi matou mananao matou ia aua ne i afaina a matou talanoaga i tagata leaga ma tagata taumafai mai e lalaga totonu o tatou fesootaiga. O le Tulafono lea toeitiiti lava uma, ua leva, ae le tau faatalia i se Tulafono le mea lenei lau Afioga, o lea ua leva ona alu le galuega. Ae masalo o le tatou Fono o i luma ona aumai lea o le Tulafono, o la e ua leva ona pasia policies a le Malo. O le ala foi lena o lea ua naunau mai ai Ausetalia, e omai loa e faatupe le tatou cyber security office i le ofisa lenei o le tatou puipuiga o fesootaiga i luga o le vateatea ona o lea ua taatitia a tatou faiga faavae. O la ua silasila i ai, ua matua ova le fiafia, a o le tatou Tulafono lava o le a sau i totonu.

O lea la o le a ou tali i le fesili lea i le infrastructure a tatou pe o alu pe o lisi, o lau tilotilo i ai i le faiga o le faatauina o le SamoaTel e pei ona ou fofola atu ma le maualalo o le tulaga na i ai, masalo a na le tuua i ai ma le uaea lea i totonu e le oo i le \$11 miliona le tau, ai pe na o sina \$7 miliona e alu ese ai i lena taimi. Ia e pei o le tulaga lena e faamalamalama atu ai lea tulaga, a o le aofia lena o le faatauga o le SamoaTel i lena taimi, ma e leai se mea e taofi ai lena mea e le Malo a o la e faaalu le faatauga atoa e tuulafoai i ai e o latou, o le mea foi, e le umi lava ae toe alu ai tupe e toe fai ai le maintenance ma toe faaleleia ai. E faitau miliona tupe e alu ai i le, ma e le o toe manaomia la e le Malo le mea lena. E pei o le agaga lena na ala ai ona fau ma me i i luma le Malo e ave i tua auaunaga nei, ia aua ne i toe alu ai ni tupe a le Malo ae na o le ao tupe lava. O le taimi lenei, we are not working hard, we are working smart. O la e faigaluega le tatou tupe mo tatou, faigaluega le Atu Kuki, faigaluega Amerika Samoa, faigaluega i Fiti, ae na o le tatou ao tupe lava le mea lea e fai lau Afioga. O le kamupani lena a le ATH, o lo o lisiina i luga o le maketi a feaatauaiga a Pasefika ma le lalolagi, South Pacific Stock Exchange. E \$1.3 piliona aseta le tele o lea mea. Afai la o lea na set up le UTOS mo nai a tatou faifaiva ma tatou faapau koko, e i ai la le olomatua faapau koko la e mafai ona faapea, o au e pule i le kamupani Vodafone la e i o i le Atu Kuki, o au foi e pule i le kamupani ATH la e i o i Fiti e ala i o latou share o lo o faapena ona tuu i totonu o le UTOS. A faapea la o lea e faafofoga mai tatou ae leai ni tou share i totonu o le UTOS, o le taimi lava lenei. O lea o le a amata, ua outou faafofoga mai ua alu le faiga paaga ma ua vavevave, tele le tupe maua mai. O le taimi lava lenei, faatau ni a outou share i totonu o le tatou Faalapotopotoga o Mavaega Tausi. Ia, lau Afioga, o le tulaga i le puipuia o tatou fesootaiga, o lena ua fai atu, malupuipuia a tatou fesootaiga.

Ona ou see mai lea i le puipuia o le tatou uaea lea o le Tuisamoa. Ia, o le Tuisamoa lau Afioga, e fai share i totonu o le UTOS, o le NPF, o le Company Insure a Samoa le SLAC. O le isi 50% lena o share o le tatou kamupani lea. E le gata i lena, o lo o i ai i totonu le CSL, o le kamupani foi a le Malo ma le BlueSky, le Vodafone, e 25% share o le Malo o lo o i ai, faapea foi le Digicel, e 20% o share o le Malo o lo o i ai tauala atu i le NPF ma le

aufaigaluega. O lona uiga la a faavasega lau Afioga, e 74% o le tatou uaea e toe foi mai lava ia tatou i Samoa lona faamanuiaga. Na o sina 26, 25% e vaeluaina e nai kamupani nei o Fesootaiga. Afai la o le faatuina mai o le kamupani leni o le uaea o fesootaiga i le amataga lau Afioga, na omai konesale mai le Faletupe o le Lalolagi, o latou ia na galulue e faatulaga le tau. O le fautuaga, faatau i le \$250 tala Amerika i le fasi uaea e 1. Ia, ae finau atu le tatou kamupani lea, e leai ua taugata tele. Mo le silafia e oo mai i le taimi leni, o la ua faatau le fasi uaea e tasi i tua i le \$15 tala Amerika, e ese mai le fautuaga lea na aumai e konesale na omai mai fafo, ona o tatou lava tama fanau la e ua i ai le agavaa ma le tomai e faasoia ai nei tulaga faapenei.

O le tulaga la na latou fautuaina, e gau kamupani. Fai mai konesale, e gau le tou kamupani, ona o le tau lea o le a outou faatauina ai. Masalo faatoa amata ona maua se tou polofiti i le tausaga e 2024. Ia a o lea na outou silasila nei i le tausaga ua mavae, ua maua le polofiti, e \$1.9 miliona lea na maua a le aufai share uma nei...

FOFOGA FETALAI: Malie le Minisita o lo o saunoa se i tuuina atu le avanoa i le Afioga i le sui usufono mo Falealili Sasae.

Afioga Fuimaono Teo Samuelu Teo (Falealili Sasae): Lau Afioga i le Fofoga Fetalai, malo faafetai o mo le faamalamalamaina o nisi o vaega. Na pau lava le itu e fesiligia foi lele e fia maua i ai se malamalamaaga. O lea ua e saunoa i le 70% o le tatou Tui Cable lea ua faaoga, a o lea e tau matau atu, masalo na o le 4 tatou ISP lea pei e tufatufa i ai. Po o le a le tetele o le aofaiga o le tele o le cable lea e faaoga e kamupani nei. Aua afai e 1 le terabyte lea e i ai pe 2, o le a le allocation ua ave ai i kamupani nei, a o a foi tuutuuga ua ave i ai? Aua e tau matauina lava, e i ai lava lou popolega i le tulaga lea o le i ai o sui o le tatou ISP i totonu o le Board lea e tau control ina le tatou cable, ona e pei e foliga mai o le a i ai se conflict of interest i totonu i i ona o latou lea e onaina kamupani, a o latou foi lea o lea e faaogaina le tatou uaea. E pei o le ala lena o lea e faafesiligia, afai la e le o faaogaina uma le uaea lea e te saunoa i ai, o le a le tetele... aua ou te le iloa pe fia allocations o tatou ISP ia e ave i ai a o le a le mea o totoe. Pe le mafai ona tatala atu i tua i nisi kamupani, ina ia fai faatauvaga e omai e faaoga le tatou cable lea aua o lea o le a tutu o la e slow le network, ae talu ai ona e tight le traffic a le au ISP ia e ave i ai ona e limiti a latou GBs ia e ave i ai. Ma lou faaloalo lava, na o se mea e fia faamalamalama.

FOFOGA FETALAI: Malo. E leai o le mea taua, sa taua i lau saunoaga faalauaitele?

Afioga Fuimaono Teo Samuelu Teo: Ia o lea lava, o lea sa ou fesili i ai. Faafetai lava.

FOFOGA FETALAI: Aua afai e le i taua i lau saunoaga faalauaitete, e te le tali mai foi i ai. Ioe. O le tatou Tulafono Tumau lena, e pei e faapena. Ae se i faatoa e saunoa ma faamalamalama le itu lea pe a tatou foi mai i le tatou malologa.

O le a faataatiaese Galuega a le Fono Aoa mo lana malologa.

Na faataatiaese Galuega a le Fono Aoa mo lana malologa masani i le itula e 10:45 i le taeao ma toe faaauau i le itula e 11:32 i le taeao.

FOFOGA FETALAI: Ou te faasilasila atu ua toe amatalia Taulumaga ma Galuega a le Fono Aoa Faitulafono. E i ai le manatu ua faapooopo le malosi i le paia o Taitai o le atunuu e faaauau ai le tatou galuega.

Ae ou te le i tapa le Afioga i le Minisita mo le saunoaga e faaauau, ou te tapa muamua lau Afioga i le Palemia.

LAFO MO LE SUIA O ITULA FONO

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai faapea foi le mamalu o le Maota, ou te tulai atu ma le faaaloalo ina ia faatu le lafo, *E toe faafoi Itula Fono o Taulumaga a le Fono Aoa i taimi masani mai le 9:00 i le taeao i le 1:00 i le aoauli.*

Faaluaina e le Sui Palemia ma le Minisita o Tina ma Tamaitai, Atinae o Nuu ma Afioga ma Agafesootai.

Na faamaonia le lafo.

Na toe faaauau felafolafoaiga i luga o le Tulafono Tau Faaofi o le Faatatauina o Tupe Faaopoopo (Nu.3) 2019/2020 & Tulafono Tau Faaofi o le Faatatauina o Tupe 2020/2021.

FOFOGA FETALAI: Ia, ou te tapa ma le faaaloalo lau Afioga i le Minisita mo Fesootaiga, Faamatalaga ma Fesootaiga Vavave Faaneionapo.

Afioga Hon AFAMASAGA LEPUIAI RICO TUPAI: Faafetai i lau Afioga i le Fofoga Fetalai, ua toe mapu mai foi le Maota nei le paia o le

Palemene mo le faaauauina o tatou felafolafoaiga. Faafetai i le sui usufono mamalu i le tulaga na laga, ae ou te talosaga atu ma ou tuualalo ina ia fai au mea faalogo ona e i ai nai mea na e pei e te le o maua mai, o le 86%. O le 76% sa ou taua pe 74% o le faiga share lea, e le o le faaaogaina o le tatou uaea. E pei o le ala foi lea, ua ou manatu i lenei taimi e toe faamanatu i le tatou aufono, a umi ona alaala ma saofafai i o tatou nofoa fai ma lulu o tatou tino, lulu lima, lulu aao, faagaoioi le tino ona e maua lelei mai ai uma tatou...

Afioga Fuimaono Teo Samuelu Teo: Lau Afioga i le Fofoga Fetalai...

FOFOGA FETALAI: Ia se i... e le o lau Afioga lea o lo o faasino i ai le saunoaga a le Minisita. O fautuaga mo sui usufono mamalu uma o le Palemene.

Ia saunoa le sui usufono mo Falealili Sasae.

Afioga Fuimaono Teo Samuelu Teo: Ona o au lea sa fesili i le Afioga i le Minisita. E ala ona ou le faaaogaina mea faalogo, o le matua lelei lava o lau faalogo. Ae o le 76% lea o share e i ai, e sao lelei lava, a o le mea lea sa fesiligia ona o lea sa taua le tulaga foi lea o le tatou cable. Na pau lava lea o le mea lea na ala ai ona ou fesiligia, aua o le cable lea i le allocation foi lele po o le a le tetele o GBs ia e faatau e le tatou ISP ona o lea e maua e le o faaaoga atoa le tatou cable, o lea e avanoa le ova ma le afa o le tatou cable.

FOFOGA FETALAI: Malo faafetai.

Afioga Fuimaono Teo Samuelu Teo: O le fesili la lena; afai e le o faaaoga atoa, ou te iloa, e i ai foi le life span o mea nei o cable. Afai e 20 pe 25 tausaga, ae a alu lava la e uma le 20 e le o faaaogaina le mea lea, o le tele ia o lea tupe maumau ae sa tatau ona allocate i nisi ISP e omai e faatauva.

FOFOGA FETALAI: Malo faafetai. Se i tulai mai le Minisita o Fesootaiga, Faamatalaga ma Fesootaiga Vavave Faaneionapo.

Afioga Hon AFAMASAGA LEPUIAI RICO TUPAI: Faafetai i le sui usufono mamalu. O lea la pei ua amata ona tau maua mai. O le tulaga lea e laga, e le o atu le Samoa Submarine e tufatufa atu i ISP ma kamupani fasi uaea, e te sau e faatau atu lau fasi uaea ina ua lava ma e manaomia. Mo le silafia e le mamalu o le Palemene ma Samoa foi o faafogafoga, e i ai predictions po o le silasila foi i luma a i latou faapitoa na tilotilo i le faaaoga a Samoa, ona o le faaaoga a Samoa na i ai e le i atoa se GB e tasi. O le latou tilotilo, e oo atu i le tausaga 2022 ua faatoa oo le faaaoga a Samoa i le 8 GBs. O le taimi lenei ou te molimau atu ma le agaga fiafia, ua ova mamao tatou i luga i le tatou faaaoga. Ae sao le sui usufono, e le i taitai ona uma ona tatou

faaogaina le paipa, e tele le paipa, ae faatalitali pea e omai kamupani e faatau atu i lo latou manaomia, aua e leai se mea e soona faatauina ai ae le o manaomia ma le maua ai se latou tupe, aua e omai faatau atu i i ona o foi lea toe faatau mai, a o lea la ua faasolosolo atu lava ma tali uma atu le tele o isi fesili.

O le tulaga lea o lo o fesiligia i le conflict of interest i totonu o le faatulagaina o le kamupani lenei a le Samoa Submarine, o lea ua uma ona ou fofola atu, se i faauma lelei lava le mea lea sa ou agai i ai ona o lea sa fesiligia faapea po o ai lea e maua ai ana tupe i luga o le mea lea, lea e faapea e tuuaia ai ia kamupani telefoni o i latou ia o lo o faapena ona manuia silisili ai i mea ia. Sa i ai upu na faaogaina mai se taimi o le saunoaga ae ou te le toe fia lotea. Ae pei ona ou fai atu, i le tulaga o lo o faatulaga ai nei pasene o fai share i luga o le kamupani lenei, e 74% e toe foi mai lava i le Malo manuia, se i vagana ai la le isi 26% lena e vaelua ai nai kamupani telefoni ia e lua. O lea la sa outou silasila nei i le tatou polofiti lea na maua mai e le Samoa Submarine e \$1.9 miliona, lona uiga o le \$1.4 miliona o lena tupe atoa e alu uma lava ia tatou, e toe foi mai lava ia Samoa e ala i faiga share a le UTOS, NPF, SLAC ma le CSL ma tulaga o lo o fai share ai i totonu o le mobile a le Telecom a le Vodafone ma le Digicel, ae vaelua ai lea o nai kamupani ia i le \$500,000. O longa uiga la, e le i taitai fuafua i le latou \$1.3 miliona o latou share sa tuu i totonu o tupe ia, o la e faatoa amata ona tau maua se mea e tau pay ai latou share a nai kamupani ia telefoni.

O le conflict of interest, e 3 aiaiga o lo o i ai i luga o i latou ia e i totonu o le laulau a Fono, le Board ma shareholders nei ina ia control ai ma faavasega ai ma faasoa ai le tatou uaea lea. E le gata la i le 3 aiaiga nei ina ia mautinoa e le collude, ae faapena foi ona saofai ai i luga le Pule Faatonu. O i latou ia o lo o aiaia ma faapena ona tilotilo i itu uma ia ia aua lava ne i i ai se taimi e galulue ai pei e taupulepule i latou ia e i totonu i i. Ae le i oo atu i ia aiaiga uma a outou Afioga, e eseese manaoga o le 3 lea a le Malo ma le 3 lea a kamupani o lo o i ai, ona o le 3 lea a le Malo e i ai, o le latou tupe maua i le taimi e faatau ai le uaea. O le latou la naunautaiga, ina ia faatau le uaea i se tau tele, ina ia faapena ona vave ona maua ai se latou tupe. A o le naunautaiga o le kamupani lenei fai telefoni, ia faapau i lalo le tau o le uaea ina ia pau ai le latou tau e faaalu ai le latou auunaga i tua, ina ia toatele ai tagata e faaogaina, o i ina faatoa maua ai le latou seleni. Matau mai la, o lea lava e regulate lava i totonu o le shareholding le kamupani ae le i faaopoopo i ai aiaiga ia e 3 lea ou te fai atu ai, faaopoopo i ai i luga ma le Pule Faatonu.

E pei o itu ia ina ia tatou nofo malamalama i ai ma maua ai foi so tatou toafilemu i tulaga ia pe afai e masalomia tulaga o lo o i ai le laulau a fono ma le Board.

O le isi tulaga mo lo outou silafia, ua latalata ina taunuu mai le tatou cable lea o le Manatua, lea e tatala nei i le faaiuga o le masina nei po o le masina fou foi, sei vagana o la e i ai ni nai mea o totoe ona faataatia lea ma taunuu

mai lena uaea. A o le tulaga o lo o i ai nei le Tuisamoa, e pei ona outou faafofoga e le i mamao atu i le tausaga 2018 na motu ai le uaea i Toga.

O le isi lava lea fesili lea sa tulai mai pea i le tulaga tau gateway. E le mafai ona tatou faalagolago i le cape way e tasi, e tataua ona i ai le gateway a tatou e redundance pe tulai mai a motu mai i, a o lea e ola i. Pei o le isi lena itu o lea e tilotilo pea i ai le Malo ma le faasinoina o nei mea, ae le gata i lena, ia i ai foi nisi auuala e sao ai i fafo, a i ai ni faalavelave e tutupu mai, motu uma le 2 a o la e i ai foi le isi auuala e sao ai i fafo. O lea la ua taunuu mai, ua 3 tatou uaea lea e i ai nei, o le uaea lea e i Amerika Samoa lea o lo o faaaogaina e le Vodafone, o le uaea a le Tuisamoa, a o lea foi o le a taunuu mai ma le tatou uaea lea.

O le a la le isi gaioiga a le Malo e tilotilo i ai? Lea na fesiligia e le sui usufono mamalu. Faaaoga. O a itu e faaoga ai? Ia e pei o le mea lena o lea ua amata ona agai i ai fuafuaga a le Malo, ua amata ona fausia se, e pei o itu uma o lo o lagalaga e sui usufono, ia o lea ua tatou agai e fausia se conducive environment mo le tatou economic benefit i cables nei ina ia faatupulaia lo tatou tamaoaiga, ia faia se siosiomaga, ina ia faatosina mai ai kamupani mai fafo, e omai la e faaoga le cable lea. O le ala lena na ala ai ona fausia ma le silasila mamao a le Malo ina ia fausia nei uaea o fesootaiga, ua avea ai nei Samoa ma ogatotonugalemu o fesootaiga i totonu o le Pasefika aua o lea ua 3 uaea ia ua i ai, ae le gata i lena, ua i ai foi ma le satellite.

Ia o lea ua amata ona faatulaga incentives po o faalauiloa foi e faatosina mai ai kamupani mai fafo e omai i totonu o le Malo. Ua i ai kamupani ia ua amata o le tatou Call Centre ma o lea ua iloilo e le Malo le latou talosaga, ua mananao e oo le latou auunaga i le 300 tagata faigaluega i se taimi vave lava ae le i oo i le faaiuga o le tausaga, ae o lo o silasila pea le Malo i itu uma ina ia faavavevave ai aemaise o lenei taimi i le toatele o i latou e le faigaluega. Ua i ai foi ma le isi kamupani, ua 2 kamupani. O le isi kamupani, o le Kamupani Accounting, o lea e faigaluega atu inei, ae latou te faia accounting a kamupani i fafo, latou te le faia ni accounting a ni kamupani pe sue foi ni tusi a kamupani i totonu o Samoa, o fafo la ua agai i ai. O i lea ua silasila i ai le Malo ina ia agai i ai mo le faatosina mai o kamupani i totonu. O le tulaga lea e i ai, e faatupulaia pea manaoga o nai o tatou tagata ma e faatupulaia le tele o kamupani i totonu o le atunuu ma le tupe maua. O lea la ua silasila ina ia faaoga uaea nei e faatosina mai ai kamupani mai fafo ina ia omai e faaopoopoina pea le tamaoaiga, faaopoopoina pea avanoa mo nai o tatou tagata. Ae o le silasila foi e pei ona tatou talanoa i ai i le amataga o lenei folasaga, o le taimi lava lenei o lo o faaoga le initaneti, ua initaneti uma tatou ae le faapea foi o maea ai le silasila pea a le Malo i le puipuiga ina ia malu aua nei fesootaiga. O la e ua i tai i luga o le uafu ua outou silafia, le fale tele lea e tuu uma ai lava uaea uma ia e fausia ai fesootaiga mai lava i Sigapore e tau i Hawaii, o le a lava le uaea o fesootaiga e fausia i le Pasefika, o i e avatu ai uaea, o i e avatu ai spare parts i totonu o le fale lea e

i luga o le uafu, lea e maua ai tupe a le tatou Malo e ala i le tatou SPA, ae faapea foi i le tele o isi pisinisi la e ua manuia atu ai ma latou.

A sau foi la ma le vaa tu ai i i, o le matua tele lava o tatou tupe. Ae mo le taimi lenei, o la e toso uaea i Papua ae lau atu i i, e fau atu i i uaea nei lau Afioga ma lau i Papua e fau ai. O lona uiga la, o lea lava ua amata ona agai mai le lalolagi i totonu o Samoa ma silasila mai, ona ua taatitia le infrastructure lenei a tatou, ma ua atoatoa le tatou fesootaiga i tulaga nei e vave ai, e le toe tau faigaluega la i o, e mafai lava ona sau faigaluega atu i inei, a o la e pay mai o i le totoi a o. E pei o le tulaga lea o le silasila mamao a le Malo.

O le taimi lenei, ia o lea sa agiga i le tatou Fono talu ai ua faatulaga le tatou Digital Transformation Authority, o lo o faapena ona vaaia e le Afioga i le Minisita, le Afioga i le Palemia, o ia foi lea o le Taitaifono o le tatou o le tatou ICT i totonu o Samoa po o le tatou Council foi o le Digital Transformation. O lea ua agai ina ia faatulaga le auunaga faa-eletoroni i totonu o le atunuu e amata mai i le E-Health po o le tatou Soifua Maloloina, o le a amata ona taumafai fesootaiga ia faia i luga o uaea ia o le Samoa National Broadband ma faaoga ai foi ma le initaneti. Ona faigofie ai lea i nai o tatou tagata ona le toe tutu i ni queue pe a o i le falemai, e le toe faia foi i ni pepa a latou faamaumauga, ae o le a i ai lava ia oe au faamaumauga, ae na o oe foi e mafai ona e silasila i ai i se taimi vave. Pe e te alu atu i le falemai, pe e te alu atu i i i nai clinics foi ia i tua, e maua lava lau faamaumauga lea pe a e manaomia i se taimi vave. E le tau alu e sue mai se pepa mai le falemai. E oo foi i faata ma mea ia, o le a faigofie ona o tatou maua tali. E le gata i lea, a oo ina faataunuu nei auunaga, o le a e nofo lava i le fale ma talosaga mai ai lou tusifolau, e te le toe tau malaga mai i Apia, na o le pau lava le mea o le a te i ua manaomia e te sau ai, na o le sau lava e saina ma piki lou tusifolau. E le gata foi i lea, a o payment on line, o le totoiina o tatou auunaga i luga o le initaneti. O mea uma ia o lea ua amata ona agai i ai. O le E-commerce, o le taimi lenei ia o lea ua outou silasila i ai, ua tau le feoai tagata faatau i le tele o isi taimi, a o lea lava ua agai i luga o le initaneti fai le faatau te i lava lea ua tu mai le tagata e kiliva mai ia te oe, ae o la e te le i agai i ai e pei o le mea e masani ai tatou.

O le tele o nei auunaga lau Afioga, o le itu lea o lea ua mafua ai ona tatou faataua i le taimi lenei le National ID, ona o le ogatotonugalemu o nei auunaga uma, faatoa mafai lava ona e agai i ai ma faaogaina pe a e faaogaina le National ID. Ma o le silasila foi a le Malo, aemaise ai o le mea lena o lou fai atu i ai i le silasila mai a fafo po o fea ua oo i ai Samoa i le tulaga tau auunaga faapenei, e pei o le ala lena ua taumafai ai le Malo ina ia faavavevave lenei auunaga ma faatino loa le tatou National ID i le taimi lenei.

Lau Afioga i le Fofoga Fetalai, o lea ua tulai mai ua maea le tele o itu uma na lagalaga ai finagalo o sui usufono mamalu ma fefulisai ai foi le tofa aua le...

Afioga Faumuina Asi Pauli Wayne Fong (Nuu Tu Taulaga Sisifo): Lau Afioga i le Fofoga Fetalai...

FOFOGA FETALAI: Malie le sui usufono...

Afioga Faumuina Asi Pauli Wayne Fong: Faafetai mo le avanoa o lea ua foliga mai o lea ua faaiuiu le saunoaga matagofie a le Afioga i le Minisita. Ae sa i ai se vaega sa lavea atu i le lauga lau Afioga, i se fuafuaga a le Matagaluega i le Ofisa o le Ofisa Faatonu lea sa faatamaia e le malaia foi, ona o le taua ia o lea Matagaluega i totonu o le Matagaluega lea, ae aoga foi le infrastructure aua le puipuiga o masini aemaise foi o foliga o le tulaga o lo o i ai le auaifaluga. Ma le faaaloalo lava. Faafetai.

Afioga Sulamanaia Fetaiai Tauiiili Tuivasa (Vaimauga Sasae): Lau Afioga i le Fofoga Fetalai, faamolemole pe maua se avanoa mo le faasaoina o le taimi o le Minisita.

FOFOGA FETALAI: Malie le Minisita se i tuu atu le avanoa i sui usufono o Vaimauga. Ia saunoa mai le sui usufono mo Vaimauga Sasae.

Afioga Sulamanaia Fetaiai Tauiiili Tuivasa: Ou te masalo o lea ua lamalama faaiu le saunoaga a lau Afioga i le Matua o Usoalii. Ia leaga o lou faalupega o oe na e matemate Malo. Manaia lava le faalogologo ma le totoa. A o le sui usufono lenei o Vaimauga Sasae o le tele ia o mea sa taua i le lauga ae leai ma se mea o taua mai i lau saunoaga.

O le mea muamua, o le TV lea na taua e lenei sui usufono, ua tatau ona toe i ai se tatou TV. E moni lava o la ua i ai le tatou channel lea e i luga o le upega tafailagi foi lea, ae ona o le naunauga o lenei sui usufono, ona o sa latou silasila i le tulaga i le po o le aso Toonai se i tulou le paia o lenei Maota, i le faaleagaina o lenei Ekalesia Katoliko i luga o le tulaga lea i le faasalalauga lea TV1 lea e i ai le sui po o le faifeau lea e fai ana lauga, lotea ai fua mea o Ekalesia.

O le tatalo la lau Afioga i le Minisita, se i silasila ane i TV nei. O le mea foi lena o lea sa faamatuu atu ai e le Malo. Manaia ia o le saunoaga a le Palemia, sa faamatuu atu ai aseta nei e faatino e latou. Ae a outou vaai i ai i le faaleagaga, o Samoa e oo loa i mea ia o Ekalesia, e leai lava se isi e le fia oti ai. E tauvatea loa mea ia o Ekalesia, e toe tau ai Samoa. A o le saunoaga a le faifeau lea i le po lea o le Aso Toonai, faaleagaina, lau ai fua mea paia

a lenei Ekalesia, e le oo i ai le malamalama. O le popolega lena, a o lea e leai ma se mea o taua mai ai se TV i lau saunoaga.

O lona lua o le tulaga lea i le faatauina o le BlueSky lea foi sa ou tatalo atu. O au o lou naunau ia i mea e maua ai tupe, ona o lea na agiga i le Maota lenei le faatauina e \$11 miliona, ae toe faatauese e \$86 miliona, leaga o lea e faalogologo le atunuu. O le a se tulaga o i ai lena tulaga, e tatau ona maua ai se tupe a le Matagaluega o Tupe Maua i le tulaga foi lea o le capital gain pe a faapea na faatau i le tulaga maualalo ae toe faatau ese. E tatau ona silasila ane lau Afioga i le Minisita i lea vaega.

O le isi o le Digicel, o lea foi na taua le, a tatou vaai foi i lea kamupani sei tulou, e lelei auaunaga na o mai e fai. Ae na o mai e fai telefoni, ua a nei? O lea ua faatino ma le isi auaunaga o le faletalimalo. E mai fea ia tupe? Se i silasila ane lau Afioga i le Minisita i tulaga lea e i ai. Ona o lea e tele tupe ia e maua ai. Sa ou tautala foi i le tulaga lea, i le finagalo o le Afioga i le Gafatasi. O lea e pei e taua pe .8 ea le tulaga i le, o lea ua maua i lau saunoaga e 3 a tatou uaea ia e sau mai i le satellite. E tele fesootaiga e aumai, ae le faamatuu i tua, faamatuu i tua ina ia taugofie ma maua uma e tagata le auaunaga. O le mea lea e i ai oe, ua tele lua cable e aumai, ae o lea lava e taugata i le atunuu. Se i silasila ane i lea vaega.

E pei o le tulaga lena, o lea e maua atu o lea o le a lamalama faaii lau saunoaga, ae le o taua mai lava le taua o TV, lea sa ou naunau atu se i fai pea se tatou TV faaagaga mo faasalalauga a aoga, faasalalauga i mea o Soifua Maloloina, ae tuu pea tauvaga a pisinisi ia. Ae o lea e maua, ua toe fautuaina vaega ia e faatino ia auaunaga se i vaai lelei, e screen lelei tagata, aua ne i sueina ai ni a latou tupe, ae vaai mea o lea e o i luga, leaga o lea e faalogologo le atunuu ma Samoa i tulaga ia. O le tulaga lena e tuuina atu i le Afioga i le Fofoga Fetalai e ala atu i le Minisita, e le i tali mai ai i manaoga o lenei itumalo.

FOFOGA FETALAI: Se i tulai mai le sui usufono.

Tofa Olo Fiti Afoa Vaai: E puupuu lava se faafesili e fia malamalama ai lau Afioga. Ona o lea sa saunoa mai le Minisita i le tulaga o National IDs, ou te talitonu lava o se tulaga lelei le vaega lea. Ae pau lava le faafesili, pe aisea le mea ua totogi ai le tagata i le \$50 e sau e fai atu lona ID? O lona lua o sou manatu i le mea lea, o le ID it's an electronic ID, sa i ai lava le popolega foi lea, o le access o le tagata i luga o fesootaiga i informations a le tagata latou ia. Ae se i faamalamalama lelei mai, po o sefe tatou i lea vaega ma le faaloalo.

FOFOGA FETALAI: O lea ua maua atu, e i ai le manatu aua ne i e toe afea i lau saunoaga le vaega lea e uiga i le \$50. Ua uma ona faamalamalama muamua foi. Malie lau Afioga i le sui usufono mamalu, se aua tatou te toe

oo i le tulaga. O lea ua uma ona faamalamalama e le Malo le tulaga lena. Leaga sa matuia lava lou aumaiga, o lona uiga tatou te toe foi i ai i le tulaga lea. Leaga e faatupu vevesi ma e faapaia mata lau saunoaga. Ae o lena e manino lava i le tulaga o le saunoaga a le Minisita o Tupe. O le mea la lea, saunoa sao i mea sa laga e sui usufono mamalu faamolemole.

Afioga Hon AFAMASAGA LEPUIAI RICO TUPAI: E moni lau Afioga i le Fofoga Fetalai i ia tulaga. Ou te le i toe sauni foi ou te toe tali i ai. O le mataupu na laga e le sui usufono mamalu o Vaimauga Sasae, e leai o le TV lena a le Malo ua i luga o le channel lena ua maimoa ai. Ona o le tulaga ua i ai nei, e le pei o le mea sa i ai le analog, e tofu lava le fale TV ma latou faiga faasalalau. E leai, ua tasi lava le platform po o le auunaga foi lea tafailagi o lo o mafai ona fai ai fefaatauaiga i luga, ae ua o uma lava i ai TV. E na o le pau lava le mea o le alu atu o le TV1, fai le latou channel, alu atu le TV2, TV3 foi ma le Katoliko, e tofu lava ma le channel. O lena foi ua i ai ma le tatou channel a le Malo ua uma ona faatulaga, ae leai se mea tau faasalalau o pisinisi e alu ai, e pei o tau atugalua ai lou finagalo. E na o mataupu lava a le Malo, e ala i le Soifua Maloloina, o le Aoga, o mataupu tau nuu ma agafesootai, faapea foi i tulaga o aoga o i ai nei, aemaise i faamalamalama a le Malo e tauala atu i le Afioga i le Palemia, ma Minisita ma nisi foi o Ofisa Sili o Pulega o Matagalua o lo o faaalu atu ai i luga. E leai la ni mea tau commercial e alu ai, ma e le mafai ona faatauva ma kamupani o lo o faia le auunaga e pei o le finagalo o le Malo na faamatu ai i tua.

O le Digicel ma le faletalimalo, o se tasi lea o Tulafono taua sa faavaeina e le Malo i tausaga ua alu. Ina ia vavae le tax holiday lea, ina ia fai ai, ona e le i lava tatou hotels i lena taimi. O lena la lea ua tulai mai ai lea ua toe aveese le Tulafono. Ua manatu foi le Malo lea ua lava a tatou hotels e faavasega mo fonotaga e agai mai ai le lalolagi. Ma faapena foi nisi o fuafuaga i le agai mai pea o turisi i totonu o le atunuu. O le capital gain lea sa e taua, e sao sa e laga i lau saunoaga talu ai, e leai se tatou capital gain i le tulaga lea, ona e pei ona ou faamalamalama atu, mai le Bluesky i le Vodafone, e leai o le kamupani lava lena. E na ona pau lava le mea o le sui o le fua ma le faailoilo ma le igoa. A o le kamupani lava lea sa o latou faatauina le kamupani a le Bluesky. O lena ua faafofoga foi i le tele o isi tulaga taua ua sao atu ai tatou ma agavaa ai. Ua taua ma faamanuiaina ai le tele o nai o tatou tagata.

O le tulaga sa fesiligia...

Susuga Hon Laauli Polataivao Leuatea: Lau Afioga i le Fofoga Fetalai, ua matauina o lea o le a see ese le saunoaga a le Minisita mai se mataupu sa taua i lau tautalaga.

FOFOGA FETALAI: Lau Afioga le sui usufono mo Gagaifomauga Nu 3.

Susuga Hon Laauli Polataivao Leuatea: Faafetai mo le avanoa. Ona o le faletalimalo lea o le Bluesky, Le Lava Hotel, pe faamata sa tatau ona i ai se share a lo tatou Malo. Ona o le tupe uma lea e fai ai le faletalimalo lea, o share a le au faisaofoaga, its a credit. Pe faamata sa tatau ona i ai se share o le tatou Malo? Afai o i ai pe afai foi e le o i ai, o le faatupu manatu lena. O tupe nei na aumai i i le Ofisa o Lafoga, o tupe uma a le au faisaofoaga e le i totoigiina. Ae matauina ma le faanoanoa, o lea ua ese le tulaga ua agai i ai. A o le agaga ia maua pea share a lo tatou Malo, ia maua ai tupe maua mo le lumanai. O le fesili atu lea i lau Afioga i le Minisita.

FOFOGA FETALAI: O lea ua maua atu le saunoaga a le sui usufono. Tulai mai le Minisita.

Afioga Hon AFAMASAGA LEPUIAI RICO TUPAI: Lau Afioga afai o lea na maua mai e le sui usufono pe afai o lea na faafofoga mai i lou faamalamalamaina share a le kamupani lea o le Digicel, e 20% la e i ai i totonu tatou share. O le tali lena o le fesili. O le hotel o le hotel a le Digicel, e na o le pau lava o le mea o la e tusi ai le igoa Le Lava, a o le hotel a le Digicel. O lona uiga la a alu alu i le lumanai ae maua share o lea kamupani ma maua ai ma polofiti, a maua se tatou vaega i ina, ae o la tatou te fai share ai i totonu lau Afioga. O le faamalamalamaga lea o lea mataupu.

FOFOGA FETALAI: Malo faafetai. Se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malilegaoui: O le tulaga lea, fesoasoani lea a le Malo e ave i le uunaiga o le au fai faletalimalo. Ua ou le ma iloa pe ua silia nei ma le 10 tausaga talu ona i ai le teuteuga lea o le Tulafono. E mafai ai ona ave le fesoasoani i le uunaiga o le fausia o faletalimalo. E ave la i ai le tatou tax credit lea. Ma o lea foi la ua i ai le taimi e faamuta ai le toe fesoasoani lea a le Malo. Sa faatino le taimi o tau uunai ni tatou faletalimalo ona o le tele o taumafaiga a le Malo sa le i tulai mai le tulaga lea. Aemaise lava ina ua matauina le televave o le alu i luga, o tagata e asiasi mai i Samoa. O lea la ua matau e le malo ua lava ia hotels. O lo o i ai lava le faamoemoe, o le a faamuta ai loa i i, le fesoasoani lea. E i ai le taimi lea ua tuu taimi ai, e le toe faaumiumia le tulaga lea, e aoga foi i le faafogafoga mai a faletalimalo, aua o le mea lava lea o lea e uunai mai, e uunai mai ina ia fesoasoani atu fesoasoani atu. E oo foi i sailiga seleni nei e fai mo taaloga i fafo, a o atu i kamupani ona faapea mai lea. Ia aumai se credit, o lona uiga la, o le Malo foi la lea e faatupea ia fesoasoani nei, e aumai e kamupani. O

le Malo, Malo, Malo, Malo lava i taimi uma. O lea e uunaia ai taaloga nei, ua tatau foi ona faamuta lea mea, e le tatau ona, a i ai lava se kamupani e fia fai sana fesoasoani i lakapi, fai sao. Ae le o le fai mai seiloga e avatu se tax credit, ua malosi tele le mea lenei o le ola faalagolago o le tele o Faalapotopotoga a lo tatou Malo.

O le tulaga lea sa laga e le sui usufono e faatatau i ituaiga ekalesia ia e fai a latou faufai i isi foi ekalesia, e tasi lea mea ou te faanoanoa tele ai, i le mea lea o le faatupu vevesi. O mea nei o ekalesia, o le ala foi lea na faatu ai le fono a ekalesia, e latou te talatalanoa. O a mataupu e feeseeseai ai, taumafai ia maua se tulaga o le galulue faatasi. Aua o uiga ia o ekalesia, latou te laugaina le filemu, ae a tulai mai loa se ekalesia latou te faavevesi le atunuu. E tasi lenei mataupu taua tele o lea e aumai i le Faavae, le mea lenei o le tagata faatupu vevesi. Atonu o faafogafoga mai ai le ekalesia lea. Toaga le ekalesia ia e toto le vaomua i totonu o lana lotoa, ae le o le taumafai e faaleaga fua le isi ekalesia. O lau matau la, o le ekalesia lea, ua fai soo lana mataupu lea. E le i leva ona oo atu ia te au, masalo po o ua 3 nei vaiaso talu ai. Ona ave lea o lau tusi faufautua, ona ua le faa-tasi pe faa 2 ae ua faatele. O mea o ekalesia o lo o i ai le Atua, ia tausolomua ona tasi le filemu ma le va nonofo o lea e i ai le fono a ekalesia, e tatau ona talatalanoa ai ia latou feeseeseaiga. O le aumai i luma o le atunuu, ae o lea e tuu atu i TV nei, TV ia latou te vaia mea ia, ia fai se latou galuega ia i latou ia latou te faia pea lenei mea o le faaleaga o isi ekalesia. O le mea lea ua leva ona le toe tupu ia Samoa. Ae o le tupu mai i le taimi lenei, e atagia ai se taitaiga o le ekalesia ma lafu mamoe o lo o i ai. O la e tele le oa o feau o lo o aumai i totonu o le Tusi Paia ina ia talatalanoa ai taitai o ekalesia, e faatupu le filemu ae le o le faaoso o le feitagai. Ma aumai le fiapoto i totonu i i, i le faauigaina o le Tusi Paia, e tofu lava le ekalesia ia ma lona ia faauigaina. Ae taua le mataupu lea sa laga, ae ua aoga foi le laga i totonu, e fai ma upu faatupu manatu ia i latou i TV, lea e aualea mai ai mea ia. Aemaise lava, o le lalolagi lenei, o taua nei e fai nei i le lalolagi, e sue sue lava ae agai lava i mea tau tapuaiga. E oo foi i taua ia e va ai pea Isaraelu ma tuaoi, o tapuaiga lava e mafua ai. E tau talatuu mai nisi mea, ae a oo loa i mea ia o tapuaiga, o lea tatou te iloa lelei le mea na tupu i le agai mai i le 900 tausaga po o le 700 tausaga, agai mai lava i le 1500 tausaga talu ai, o le fetauai o ekalesia. Tatou te le toe fia vaai i ni mea faapea, e tupu mai i se atunuu e faavae i le Atua. Ou te tatalo ia tilotilo lelei i ai taitai o le ekalesia lea, afai e faavae i le Atua le atunuu lenei, tausolomua latou ona faataoto taiala e maua ai le filemu i totonu i va o ekalesia.

Lau Afioga i le Fofoga Fetalai, o le tali atu lea.

FOFOGA FETALAI: Malo, se i tulai mai le Minisita se i saunoa.

Afioga Hon AFAMASAGA LEPUIAI RICO TUPAI: Faafetai telei lau Afioga i le Palemia mo le toe faalauteleina o lenei mataupu. O le mea mulimuli lea o le a ou tali atu ai, o le Ofisa o le Pule Faatonu, lea sa laga e se tasi o sui mamalu. E moni e tele le taua o lea tulaga, ma o le taimi lenei o lo o faagasolosolo pea ia sailiiliga a le Ofisa o le tupe faapea foi le Ofisa o suetusi a le Malo, a o faatalitali foi le tulaga i le tali mai o le insurance, le kamupani sa insure ai le fale o le Pule Faatonu. A o le taimi lenei, o la ua matua manaia lava le latou ofisa la ua i ai faatasi ma le 2AP, ona o le tele foi o le fale o le 2AP o lo o i ai, la ua maua ai lo latou avanoa, latou te faifai mea faatasi ai ma fai mea fiafia ai i tai i Mulinuu.

O le tali atu lea ma le faaaloalo i mataupu uma sa faapena ona folasia, e sui mamalu ia latou saunoaga. Ou te manatu foi, e tau lava ina ou faapea atu i paaga uma lava a lenei foi lala tumaoti o le Malo. Faafetai tele lava i kamupani fai telefoni, o kamupani fai TV, auaunaga tau ISP, aemaise foi ia i latou o lo o feagai ma paaga mai fafo o lo o fesoasoani mai pea i taimi uma i lea mea ma lea mea a le Malo e tagi atu ai, faafetai tele lava i la outou lagolago, aemaise foi i le Samoa IT Association, o se tasi lea o tulaga taua ua faatulaga e le Afioga i le Palemia o matou Matagaluega nei, o le faatulaga faatasi lea o se isi asosi e toe faaopoopo i ai, e faia ia galuega faapenei, o lea na outou silasila i ai i le feagai ai o training fua ia sa fai mo aoga. O lea la ua faaoga mai e aoga platforms sa auaunaga sa faatulaga e IT Association, e momoli atu ai le faamalo i kamupani uma ma le afaigaluega a le Malo o lo o gafa ma ia tulaga. Faamalo i Ofisa Sili o Pulega aemaise foi le afaigaluega uma a lenei lala, faafetai tautua, aveai ai pea lo outou fiafia e galulue, ma maua lo outou malosi.

Lau Afioga i le Fofoga Fetalai, si ou itumalo pele, Fasitootai ma Vailuutai i le paia i le afifio o Aiga Taulagi, afio lau afioga i le Maopu o le Tuiaana, aemaise le mamalu o le alalatai ia te oe le alii o aiga ma le mamalu o le Falefitu. E le gata foi i lea o si o matou nuu o Satapuala, o lea ua faafofoga le paia o le Palemene i lenei taeao ua agiga lou Toeolesulusulu. Ia le afio i lau afioga i le Saoalii, o oe na e matua i tofiga, o le Aiga sa Tuala, afifio le paia o le Aiga sa Tuala, ae tainane lau Fetalai Vaili o le Laau na Fausia, o le tootoo o Maauga ma Nuuasala. Lauti na laulelei ia te oe Tapuala ma le Vaigalepa ma le mamalu o le Faleaana.

Ae le gata foi i lea o si o matou nuu i Faleatiu, le afio o le tamaitai tasi o Aana, afifio Fonoivao ae tainane lau fetalai Talimatasi ma le mamalu i le faleaana ma lo tatou nuu. Si a matou ekalesia foi ma si o matou nuu i Sagafili faafetai tele mo la outou tapuaiga, faafetai i lo outou nofo tatalo aua le alofaiva ai o le Malo ma lenei tofi o lo o tauave e la outou sui usufono aua le auaunaga i itu uma, o lo o faaleleia ai atinae ma le tamaoaiga o Samoa. Faamanuia tele le Atua ia te outou.

Lau Afioga i le Fofoga Fetalai, ou te toe manatua si ou tuua, faatoa fai atu nei i lagi lana folauga i le masina ua mavae. Ua toe o si ou tina o lo o soifua

nei ma tapuai mai. E o i sa ao ai le olaga o le finau ma le ola mativa sa i ai foi i lena vaitaimi, i le taumafai ai. Sa matou ola ane i tua i togavao, i se olaga mativa i na foi vaitau e le i i ai ni telefoni. E tele le faaletonu o auala e tai 2 kilomita e alu ai faatoa oo i tua ia matou. Ou te manatua pea le isi aso na oso ai le mai o le matou tuaoi, ona tuli lea o au e si ou tama, ou te alu i le solofanua, aua e na o le pau lena o le auala na maua ai le feoaiga i lena taimi, e le fia feoai ni taavale i le leaga o le auala. Ae le i i ai foi ni telefoni e vili ai i tai i le falemai e sau se ambulance. Ona ou alu lea i le solofanua vaeane le paia o le Maota ma Samoa o faafogafoga. E faalava i ou tua le mai o si tuaoi lea o matou. O le tua lona 3 o le vae o le solofanua i maa i le leaga o le auala na sulu ai i lalo, ae sue atu ua leai se mai o ma o, ai ua leva lava ona pau i tua. Lea na ou toe alu atu ai talu ai nei, o la ua uma ona faata matou auala ua tau i uta, ae o la e tietie mai si toeaia lea i lana taavale. E pau lava lana tala na valaau mai ia te au, son faafetai lava, na o le pau lava lea. Ae ua ta vaai i le agaga faafetai o nai tuua foi i le fesuiaiga ua i ai, aemaise i le tulaga o le auunaga a lenei Matagaluega. Ae pei e agai lau faamatalaga i lea itu, ona o si ou tama, ua toe manatua ua fai i lagi lana folauga.

Le paia e o le Palemene lau Afioga i le Fofoga Fetalai, faafetai tele i lou faatautaiga o le tatou Fonotaga. Faafetai i lou onosai ma le lavapapale foi, ia manuia ou faiva. Ia faapena ona maua pea lou soifua malosi e tautua ai pea le Atua e ala i lou tofiga ua tofia ai o le Fofoga Fetalai o le Maota nei. Le paia e i le Palemene, lau Afioga i le Palemia ma le Kapeneta, sui usufono mamalu uma aemaise le lautele o Ofisa sili o Pulega ma i latou uma o tautuaina le tatou Fonousu, ia faamanuia le Atua ia te outou. Ia maua lo outou malosi e tautua ai Samoa. Samoa e, ia mau pea le too, ia tumau pea la outou tatalo ia faapena ona tapue ai o matou faiva, o le galuega o lo o fai, o lo o faapea ona faatino i le atoatoa, aua le manuia o Samoa.

Faafetai tele i lau Afioga mo lenei avanoa.

FOFOGA FETALAI: Malo faafetai saunoa i lau Afioga i le Minisita Mo Fesootaiga, Faamatalaga ma Fesootaiga Vavave Faaneionapo. O lea ua oo mai le faasologa i lau Afioga i le Minisita mo Faamasinoga ma Pulega tau Faamasinoga ma le Ofisa o le Komesina o Faiga Palota.

Tulai maia lau Afioga.

Afioga Hon FAAOLESA KATOPAU T. AINUU (Minisita mo Faamasinoga ma Pulega tau Faamasinoga ma le Ofisa o le Komesina o Faiga Palota): Lau Afioga i le Fofoga Fetalai, faafetai mo lou avanoa. E muamua ona ou faatalofa atu i le paia faatafafa o le Maota, i le afio o lau Afioga i le Fofoga Fetalai, afio foi le Afioga i le Palemia, faapea le Kapeneta ma Minisita Lagolago. E faatalofa atu foi i lena itu o le Maota, i le afifio o Taitaifono ma sui usufono mamalu uma o le Palemene a Samoa.

Avea foi lenei avanoa e faatalofa atu ai i Ofisa Sili o Pulega o Matagaluega, Faalapopotoga Tumaoti a le Malo, ua mafai ona tatou faatasi ai i le aso. Faamalo le tauatai faamalo le onosai.

Ou te faatalofa atu foi i le tapuaiga a lana Afioga Mamalu o Le Ao o le Malo ma le Masiofo, le Sui Ao ma le faletua, faapea le tapuaiga mamalu a Samoa.

E le galo foi le nofo tatalo a le au faigaluega faauuina a le Atua i fatafaitaulaga e fia o lo o nonomanu aua se manuia o Samoa.

E faapitoa sau faamalo i le tapuaiga a si ou itumalo Vaimauga i Sisifo Nu 2, i le afifio o Tama Alosina, Fuaifale o Salevalasi, Faletolu ma le Vaigalelepa. E le vaea foi le falaooto i le afifio o Usoalii, afifio Matua ma Aiga Sa Malietoa, maliu mai oe Tuisamau, Faletolu ma le Vaigalelepa ma le loaloa o le tatou itumalo.

Lau Afioga i le Fofoga Fetalai, e le tele ni sui usufono sa afea le Matagaluega o Faamasinoga ma le Ofisa o Faiga Palota. O le tele o sui usufono na momoli mai faamanuiaga i le tulai mai o le tatou Faamasino sili fou. E avea foi lenei itula, e faaleo ai le agaga faafetai i le Afioga i le Ao mamalu a le malo, mo lana tofiga. Ae a le Afioga i le Taitai o le atunuu le afioga i le Palemia, ma lana fautuaga mo lea tofiga maualuga, e pei ona seei ai le tatou Faamasino Sili, le afioga ia Satiu Leatigagaeono Miti Simativa Perese. E i ai nai mataupu laiti sa laga e sui usufono.

E i ai le mataupu lea sa laga mai e le sui usufono mo Falealili i Sasae, le Afioga i le gafatasi. Sa ou taumafai e avatu i ai se tali, ae peitai ane e le i atoatoa le tali na tuuina atu. Sa fesiligia e le sui mamalu, le tau mo le faatinoina o vaegatama, adoptions. O le matau a le sui mamalu ua fai si maualuga ma le taugata pili a loia o lo o faatinoina le vaegatama. Pe i ai se fesoasoani a le malo i lea itu, o lea foi sa tulai atu le Palemia ma avatu se faamalamalamaga o lea mataupu. Sa avatu foi lau tali e faapea, e fuafua lava e le vasega o loia a latou pili, ma o le tulaga foi lea o lo o faia i le taimi nei. Ae ina ua faia le malologa i le aso lava lea, sa faamanatu mai ai e le Loia Sili ma le Resitala o le faamasinoga. O lo o i ai Tulafono ua uma ona pasia i le 2014, ua 6 tausaga talu ai, o lo o aiaia ai pili a loia. Ae o le faalavelave e oo mai i le aso, e le i faamalosia lava. E i ai tuutuuga faale-tulafono e tatau ona faamalieina muamua faatoa mafai ai ona faamalosia le Tulafono lea. O le tali atoatoa la i lau fesili le sui usufono mo Falealili i Sasae. Ua maea ona faia e le Malo Tulafono e tali atu ai i atugaluga e pei ona e fesiligia, e toe lava o le faatinoina.

Ae i ai le mataupu e sili lona taua, lea foi sa saunoa i ai le Afioga i le Palemia. O le fesili, pe tatau ona tatou faaauuina ma faafaigofieina le vaega lea o faiga vaega tama o tatou fanau e pei ona fai nei? O lea e faafofoga le paia ma le mamalu o Samoa, ua mafua se lagona ona o lea ou te manatua, pe 2 tausaga talu ai, sa talanoa mai ai le Afioga i le Palemia, e toe tilotilo i se teuteuga talafeagai o le Tulafono lenei. Sa i ai le fonotaga sa ou auai i Bali

Indonesia i le 2018, ua taua o le **human trafficking po o le moden slavery**, ma a fua i ai i le autu o lea Fonotaga, ma fua i le faigofie ona vaetamaina o tatou alo ma fanau i Samoa nei. E masalo ua lalata lava ia le tulaga ua i ai Samoa i fautuaga o lena Fonotaga. Ia foia lea faiga. O mafuaaga lea ua finagalo ai le Malo e toe iloilo le Tulafono lea e faatino ai vaegatama. Ona o le tele o matua ua saili fesoasoani atu i le Afioga i le Palemia. Ina ua ese le mea ua tulai mai, e mautinoa sa laualuga i manatu o matua. O le faatinoina o le vaegatama ua avea lea ma auala e saili manuia ai alo ma fanau i atunuu i fafo. Ae lilo i o latou manatu e i ai toatuga e ono aliae mai. O lea la e i ai le teuteuga o Tulafono o Vaegatama ua maea ona tapenaina e le Ofisa o le Loia Sili, o le Resitala o le faamasinoga, e i ai le faamoemoe e tuuina mai i le Maota nei, i le isi Fonotaga o lo o lumanai nei mo le pasiaina.

Afioga Fuimaono Teo Samuelu Teo: Lau Afioga i le Fofoga Fetalai...

FOFOGA FETALAI: Se i tulai mai le sui usufono mo Falealili.

Afioga Fuimaono Teo Samuelu Teo: Ou te faafetai i le Afioga i le Minisita o lea ua manino lea vaega sa ou fesiligia, o lea foi sa famainino. E pau lava le popolega foi lele, ona o lea sa tali le Afioga i le Minisita ina ua ou fesiligia, o lea ua ou toe faitau i le Hansard. O le saunoaga a le Minisita faapea e leai se malosiaga o le Palemene e fuafua ai fees a loia. E le mafai ona i ai se malosiaga. Ae o lea foi ua saunoa o la e i ai le Tulafono, ua uma ona fai atu iinei. E pei o le agaga lena o lea na ala ai ona tau soso atu. E leai o iinei i le Palemene e faufau atu ai Tulafono, ma o tatou vaega faapena. Ae o lea ua manino lava faafetai.

Afioga Hon FAAOLESA KATOPAU T. AINUU: Lau Afioga i le Fofoga Fetalai, e pau lava le faasaoga ou te fia faasao atu, ou te le i faia sea lafoga, e leai se malosiaga o le Palemene.

Afioga Fuimaono Teo Samuelu Teo: Lau Afioga i le Fofoga Fetalai, ou te le faafinau, a o lea e mau i i, leaga o au lea sa faia le fesili. O le tali foi lena a le Minisita na ala ai ona ou toe tulituliloa.

FOFOGA FETALAI: Malie le sui usufono se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: E masalo o le itu taua lea ua saunoa le Minisita e taatia mai, se i toe tilotilo i ai po o le a le mea ua tuai ai ona faatino. Po o ai e ana le pitolaau, o lea foi e tau mafaufau atu o le pitolaau a loia ua leva ona tataua ona fai ae mumusu e fai. Ua tataua ona tulituliloa le mataupu lea. O le mafuaaga na ala ai ona ou tulai atu, ona o le

tele o faasea ua toai atu i le Malo, ma le mafuaaga lea na ala ai ona fai le Tulafono lea, ae se i toe tilotilo po o le a tonu lava le mea ua tuai ai. A o ai foi e mafua ai.

FOFOGA FETALAI. Tulai mai le Minisita o Faamasinoga.

Afioga Hon FAAOLESA KATOPAU T. AINUU: Faafetai i le Afioga i le Palemia, o lena ua malamalama le mataupu. O le autu o nei faamatalaga, e le o nofonofoa'i le Malo, o lea lava e taumafai le Malo e tali atu i manaoga o le atunuu o lo o tagi mai mo se fesoasoani. E saili vaifofo le Malo, aua o lona tiute lea.

O le sui usufono mai Lefaga ma Faleaseela, sa fesiligia le auala o le filifiliina o Faamasino Samoa. O le manatu o le sui usufono e tataua ona saili mai i itumalo taitasi, po o nuu taitasi a Samoa ia le filifiliga o Faamasino nei. Ua taatia ia le tatou Faiga Faavae. O le Faiga Faavae fou ua maea ona faataatia e le Peresetene o Faamasinoga o Fanua ma Suafa. O le taimi muamua leni, ua faamuamua ai le agavaa ma le tomai i le poto salalau e tauala mai i le faiga o suega tusitusi. A pasia lea suega, ona avanoa lea e faatalatalanoaina, interview.

O lo o fesoasoani ai le Komisi o Galuega a le Malo i lea faiga. O lona uiga ua siisii agavaa e manaomia i a tatou Faamasino Samoa. Ma o le agaga tonu lea o lea Faiga Faavae. Ia filifilia Faamasino e eseese nuu uma e omai ai, ina ia aua ne i toe feteenai se Faamasino ma se mataupu, ma avea ma mafuaaga e toloa ai le faatinoina o faamasinoga. Ma ua matauina le aoga o lea fuafuaga, ua le o toe i ai se faamasinoga ua toe toloa mai le amataga o le tausaga nei, ona o se feteenai o le Faamasino ma le mataupu o lo o suesueina.

Sa fesiligia e le sui usufono mai Faasaleleaga Nu.2. se fua faatatau o le Komesina o Palota mo le atunuu e faimalaga i Savaii e faatino a latou palota. O lea e feutagai nei ia le Komesina o Faiga Palota ma le Matagaluega o Tupe mo se fesoasoani. Leaga o lea ua saunoa ia le Minisita o Galuega, e leai se tagata e malaga fua. E leai se tagata e tietie fua. E totogi uma pasese e malaga ai. Ma o le a faalauiloa atu i se taimi o i luma, pe a mautu lea fuafuaga.

Sa talosagaina foi se fale o Faiga Palota i Savaii e pei ona fai i Mulinuu nei. Mo le silafia, ua savali nei i le 2 masina talu ona amataina ia le galuega fou o le Ofisa o Faiga Palota i Mulinuu, o lo o faasaga mai i le ituala i tai ia le galuega lea. Ma e i ai le faamoemoe e maea ia Tesema o le tausaga nei lea galuega tele. Ma o le taimi muamua leni, ua fausia ai se Nofoga Tutotonu o le Ofisa o Faiga Palota talu mai le Tutoatasi o Samoa.

O le tasi leni fuafuaga faataatia a le Malo leni i leni Paeaiga. E le gata i lea, ua tele isi fuafuaga ua mafai ona ausia i le faatinoina e le Komesina o Faigapalota i totonu o le Paeaiga leni. Mo se faataitaiga muamua, o le toe fuataiga o Tulafono, e ala i le faauluina ma pasiaina o Tulafono fou nei e 3.

O Tulafono o Faiga Palota 2019, Tulafono o Itumalo Faapalota 2019, Tulafono o Komesina o Faiga Palota 2019.

Lua, o le faaaogaina o fesootaiga faatekonolosi sa mafai ona foai mai e le Malo o Korea i Saute i se tau e \$3 miliona. O lo o faaaogaina nei e le Ofisa o Faigapalota mo le faatinoina o ana galuega. O le faagaioiina o lesitala o tagata palota. Na amata mai lava ina ua maea ia le palota i le 2016. O le agaga, ia maua uma e tagata agavaa le avanoa e resitala ai, ma palota.

O lona fa, a matauina e le Komiti Faa-Palemene o Tulafono, o le Komisi o Faiga Palota ia le isi itutino o le Malo, ua ausia le tuu mai o ana lipoti faaletausaga i totonu o taimi faatapulaaina, up to date. Ua faafaigofie ai le faatinoina o galuega a le Komiti. O le fausiaina la o le fale mo Savaii, o se fuafuaga alualumamao lea a le Malo e faatino pe a lelei le Tala o le Tupe.

Sa faaalua foi le atugaluga o le sui usufono mamalu mai Gagaifomauga Nu.3 i le Nofoa o Saleaula, ua maea ona faamalamalamaina e le Taitai o le Maota le vala lea. Ua saunoa ai foi i ai le sui usufono mai Saleaula. Ae ou te faamamafaina atu, o itumalo fou nei ua faatulai mai i le Tulafono o Itumalo Faapalota, o Itumalo Faapalota. E le o ni Itumalo Faaleaganuu. E mafua lea faiga, ona o le finagalo o lo tatou atunuu, e avea lea tu ma le aga faapapalagi, o le faigapalota, e filifilia ai o tatou sui usufono e omai i le Maota lenei.

Tofa Hon Faasootauloa Pati Taulapapa (Gagaemauga Nu.2): Lau Afioga i le Fofoga Fetalai...

FOFOGA FETALAI: Ia se i tulai mai le sui usufono o Gagaemauga Nu.2.

Tofa Hon Faasootauloa Pati Taulapapa: Ou te faafetai lava i le Afioga i le Minisita, lea ua taua mai ia le itumalo e le o se itumalo, o le itumalo faapalota.

O au e tumu i le faaaloalo, e tumu foi i le migao. Ma ou te faaeteete lava, ona e pei lava o lau tala lea na fai muamua atu, o Samoa lava ua uma ona tofi. E le i tofia i se tulaga faapalota. Na tofi Samoa, Tumua ma Pule. O le agaga lea ia te au ma lou faaaloalo lava, sa ou talanoa foi i le Afioga i le Minisita ma sa aumai foi lou itumalo, oi o le Afioga i le Palemia, sa aumai foi lou itumalo. O le upu a le Afioga i le Palemia ia te au, o se mea se i faataitai pe talafeagai pe leai.

O le mea la lea lau Afioga i le Fofoga Fetalai, ou te tatalo atu ai pea, leai e le o se tofiga na tofia i se tulaga faapalota. Na tofi i tulaga a Pule, Tumua ma Pule e Ono i Salafai.

O lea ou te tatalo atu ai ma lou faaaloalo ma le migao e tatau ai, ina ia faapena ona tuu atu pea i tafatafa o le Faigamalo, ou te le nofoai foi ae ou te tatalo pea, e ui lava i tulaga o Faavae o Samoa, ae o le tofiga o Tumua ma Pule, o lea ou te tatalo atu ai ma lou faaaloalo, ina ia faapena ona toe faafai mai lou itumalo i le mea sa i ai. Ma lou faaaloalo lava.

FOFOGA FETALAI: Malo faafetai, malo. Faafetai ia te oe le toeaina matua, ma ou te fautuaina le Afioga i le Minisita, ua maea ona faamanino ma faamalamalama e le Taitai o le Malo le vaega lea ma le vaiiliu lea. Ua leai se vaega e le manino i le faafofoga tapuai mai a Samoa. E le faigofie lava i le tulaga i le tatai i le aganuu, ae o tatou, o le faatinoga o le tatou palota. Ia ona foi lava lea i le aganuu latou o ai e faapena? O ai e matua? O ai e laitiiti? Ao ai na tuu i ai? Ao ai na tuu e talai? Aua e faapena, o le isi ia e faapena. O Samoa ua uma ona tofi. E le ave ifo la ia tatou palota, e talepe ai Samoa ma tofiga o le atunuu. Taoto tofiga ae o le tatou faiga palota lea e i ai. O le mea lene ou te faamalulu atu ai i le sui usufono.

Tofa Hon Faasootauloa Pati Taulapapa: Se i saunoa mamalu lau Afioga i le Fofoga Fetalai, aua le tuulafoai ia saunoaga faapena.

Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui: Lau Afioga i le Fofoga Fetalai, masalo e taua lea itu ua e saunoa i le mataupu, leaga o lea e nonofo mai Leulumoega, Tumua, Lufilufi. O ai lea e umia le tofi o Lufilufi? O Alaiasa, le Falefa. O ai lea e umia le tofi o Leulumoega? O le Nofoalii.

O le ala lene o lea sa ou faapea e taoto ai i i lea ua faamalamalama. Ae faagasolo i isi mataupu na e totoe.

FOFOGA FETALAI: Faagasolo i mataupu na e totoe. Ia o le manatu foi lene o le Nofoa. Tulai mai lau Afioga i le Minisita.

Afioga Hon FAAOLESA KATOPAU T AINUU: Faafetai i lau Afioga i le Fofoga Fetalai, o lea ua manino lea mataupu.

Tofa Namulaulu Sami Leota (Faasaleleaga Nu.2): Lau Afioga i le Fofoga Fetalai...

FOFOGA FETALAI: Ua... o le mataupu lea...

Tofa Namulaulu Sami Leota: Leai, leaga o lea sa ou faalogologo lava pe tali mai i le mataupu lea, na ona ou faafetai i le Afioga i le Minisita, e ese lau mataupu. Leaga o lea sa tali manino le Afioga i le Minisita o Kamupani e le mafai le tulaga lea. Ae na ona ou faafetai atu o lea ua tau maua atu i le Afioga i le Minisita, o le mea lea na ou talosaga i ai aua o lea e naunau le tatou Ofisa Palota ina ia faapea ona faamalosi le palota o tagata uma.

O le mea foi lene sa ou tatalo atu ai i se avanoa e malaga fua ai le aupalota i Savaii. E faafetai la o lea ua manino le tali a le Minisita se i tagai i ai, leaga o lea sa tali mai le Malo muamua e le mafai ona o la e tau sue foi tupe a

Kamupani Vaa. Ae e pei o lea ua maua atu i le saunoaga a le Minisita, faafetai, o lea o le a tagai i ai le Ofisa o Faiga Palota.

E ese lau mataupu e ese mai le mea lea. O Pule, leaga o lena e silafia, e pau lava le Pule lea e i i totonu o le Maota e na o Safotulafai, faafetai.

Afioga Sulamanaia Fetaiai Tauilili Tuivasa: Lau Afioga i le Fofoga Fetalai e fia faasaina o le taimi...

Tofa Hon Lopao Natanielu Mua (Minisita mo Faatoaga ma Faigafaiva): Lau Afioga i le Fofoga Fetalai, leai ua ou tulai atu lau Afioga, ma le ava ma le faaloalo, ou te le fiafia i le faaloatauaaina o le Usoga, o le Usoga a Pule e Ono. Lima isi Pule la e i ai ma le Pule o Aiga ma Salafai, na sue i le toto. Aua la ne i toe faia ni saunoaga e vevesi ai le Usoga. O le Usoga e filemu, o le Usoga foi e i ai le avafatafata. Ua leva foi lava na olo le fua ma faalogologo lau Afioga ae tuu ia faapea o lea ua maea lea tulaga o le tatou Tualumaga o lenei mataupu.

Afioga Hon Lautafi Fio Selafi Purcell (Minisita mo Pisinisi, Alamanuia ma Leipa): Lau Afioga i le Fofoga Fetalai...

FOFOGA FETALAI: Ia, leaga o lea ua tulai mai le Minisita o...

Afioga Hon Lautafi Fio Selafi Purcell: E fitifiti ai le pute o Satupaitea, leaga e ono i ai Pule. Ia o lea foi e le o i i lau Minisita Lagolago, ia o Palauli foi le isi foi Pule. Tutusa uma lava pule, aua le faasilisili fua, aua le tatou tau o fua i mea faaonaponei. O la e taoto lava Pule o Salafai e Ono, e tutusa uma Pule. Ia na ona, e pei e sili lava Satupaitea, ae ua lava ia lea, faafetai.

FOFOGA FETALAI: Ia, malo. Ia se i tulai mai le Tamaitai Minisita o le Soifua Maloloina e faigata foi le Alii o le Itu.

Tofa Hon Faimalotoa Kika Iemaima Stowers (Minisita mo le Soifua Maloloina): Lau Afioga i le Fofoga Fetalai, faafetai ua maua le avanoa. Ia, o lenei foi lava e nofonofo ma faalogologo atu ma le totoa i felafolafoaiga a le Maota. Ae leaga o la foi e faafogafoga mai ia si ou itumalo. Leaga o le faalupega o lou itumalo, Lau Fetalaiiga le Tulafale, o lau Tia e le maseua, ma e o le Pule na mua i malae, se e tele le fia talanoa, ia ae na ona faaata atu faapena, ina ia o tatou talanoa i mataupu. Ia leaga e lagalaga ai finagalo ma manatu o lo o faafogoga Samoa. Ia manuia le Fono.

Afioga Fuimaono Teo Samuelu Teo: Lau Afioga i le Fofoga Fetalai...

Susuga Hon Laauli Polataivao Leuatea: Lau Afioga i le Fofoga Fetalai, ma le agaga faaaloalo. Ona o lea sa taua lou itumalo i le saunoaga i le Afioga i le Minisita. Ia e leai lava se agaga e toe faataumatatao o lea ua saunoa Saleaula. Saleaula, ua uma ona fai atu le matou upu tatou fai lena. Tatou olo le fua ma onosai, ia ae o lea e matau atu, Safotulafai toa le tai. Se e le tau lagalaga ma tatala le tatou oooo popo i le Maota. Po o fea e tataou te taulalagi i ai, la ua i ai Pule Faavae. Onosai, mau le toovae, ae e le se mea e tau vailiilia i inei o la ua uma ona tuumatamaga ia lo tatou vanonofo. Ta musu ne i te i faapea Samoa po o ai e sili? E sili uma lava tatou. E pau lava le mea, tulai mai e laveai le Nofoa o Saleaula. Ma lou agaga faaaloalo.

Afioga Fuimaono Teo Samuelu Teo: Lau Afioga i le Fofoga Fetalai...

FOFOGA FETALAI: Faafetai. Se i tulai mai lava....

Afioga Fuimaono Teo Samuelu Teo: Leai o lea ua matau atu pei e foliga mai o lea o le a tausailiili ia Pule o le Maota. Ae o lea lava e lolo lava tootoo o Tumua nei. Se i o foi i Salafai, ona sailiili lea po o ai Pule Faavae po o ai Pule Tofia ae o ai la e atipa o Pule? Aua e nofo manino i ai Leulumoega ma Tuisamau ma Lufilufi, o lea lava e toa le tai. Ia ae o lea e nofonofo le tamaloa Vaimauga o lea e leoa le eleele lenei faafetai.

FOFOGA FETALAI: Malo, se i...

Afioga Sulamanaia Fetaiai Tauiliili Tuivasa: Faafetai i lau Afioga i le Fofoga Fetalai,

FOFOGA FETALAI: Malo, se i...

Afioga Sulamanaia Fetaiai Tauiliili Tuivasa: Faafetai i lau Afioga i le Fofoga Fetalai. O lea ua faamanatu mai aua foi e Susuga Lufilufi, Susuga Tuisamau, e leai lava se gaoia a Tuisamau, leaga o ou eleele, o i Savaii. O e o e pue leaga o le saunoaga, o lea e faaoloataua mai i le saunoaga a le Palemia o lea e tau na o Leulumoega ma Lufilufi, ae e le o taua ia Tuisamau.

Lau Afioga i le Minisita o lea sa saunoa i le tulaga lea sa ou tatalo ai i le lauga mua lea a Faleaseela. Sa ou ave ai le mataupu lea e faatatau mo mea o Sui ia i totonu o Faamasinoga, ona sa tatalo mai ia le sui usufono lea o Faleaseela, Tuisamau e a pe a ou lauga mua, ou fai atu o lou faalupega lena o le a avatu. So o se Tala o le Tupe lava, e te lauga mua lava. Ae a oo loa i ooooga o mataupu i totonu o le Palemene, o le mea lena a Tuisamau.

O lea la lau Afioga, o le agaga sa avatu ai le Tulafono lea, ona sa ou tuualalo i ai, ona e matamuli ona o le tulaga foi na o le faaaloalo i le Minisita. O le Minisita o le Vaimauga auliuli lava. E le gata foi i lea o le Sui o le Vaimauga

lava. Sa ou tuualalo la i i Faleaseela e oso mai ai le Mataupu, i nai matai Samoa foi na i le tulaga e le oo i ai aoaoga, e lelei le fofoga i le faiga o le nuu, faiga o tulaga faaosii aiga, ae e le saofaga la i tulaga tusitusi. Ia o le ala lea sa talosaga ai e faaauuala atu i le sui usufono o Faleaseela, se i fofoga atu i matai na e le lelei aoaoga, ae o le aganuu ma le talaga o gafa ma faasinomaga o aiga, ua tapena atoa i le tulaga lea o Faamasinoga. Pei o le ala lena lau Afioga i le Fofoga Fetalai...

Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui: Lau Afioga i le Fofoga Fetalai...

FOFOGA FETALAI: Malie le sui usufono, se i tulai mai ia le Palemia.

Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui: Sa ou manatu o lea ua lava ma totoe ia le faamalamalamaga a le Minisita, ae e taua lava le fesili na aumai e le sui usufono o Lefaga ma Faleaseela, o le faasilasilaina aloaia lea, e tusa ai ma le faamalamalamaga a le Minisita. O lea lava e avanoa, e alu atu loa le faasalalauga, se tau fai tusi talosaga uma i ai. Aua foi e te vaai mauualalo, i toeaia, se na soifua mai lava toeaia o aoa o le Pi Tautau. Ia ua galo ia te oe. Aua le vaai mauualalo i le mea lena.

Ae o le itu taua lava, o lea ua aumai e le fesili ma ou faamalamalama, e avanoa uma lava Samoa atoa e talosaga i i. Faapea se mea leaga le aumai e 400, 500 tusi talosaga. O le mea taua lena. O lea faatoa malamalama, e tusi talosaga. E le o taofia la se isi o lea e avanoa tutusa uma lava tatou i le taua lena, o le fesili lea na aumai, o le taua foi lena o le tali.

Lau Afioga e le o se mea e lagalaga ai le Maota.

FOFOGA FETALAI: Malo, ia ma ua ou faamuta ia le... Namulauulu ou te vaiaia atu e pei e te tau...

Tofa Namulauulu Sami Leota: Leai e na ona ou faamalulu atu i lau Afioga i le Fofoga Fetalai, o le mea lea na ou musu ai. O lea na ou talanoa atu i pasese o nai tagata e o i Savaii, ae o lea ua lagalaga ai Pule ma Pule ma Pule, leaga o le mea lea na ou popole i ai, o lea o le a tauemu mai Tumua ia o lo o i ai Fuifatu e tatou te fonu i ai. O le vaiaso lea tatou potopoto i Fuifatu, faafetai.

FOFOGA FETALAI: Malo, o le mea lea o pasese, leaga o lea ua e talosaga i o i le Minisita o Faamasinoga ae o lea na tali mai ma saunoa mai ia le Minisita e fitoitonu i ai vaa, e le mafai lena mea. Ia ae o lea foi ua toe laga mai, lea sa saunoa i ai le Afioga i le Minisita o Vaa. Ioe, ae o lea lava e

lagalaga mai ia le tulaga o mataupu, o lea la ua tulai mai le vevesi, ia se i alolofa ia, fai atu foi, o le mea lea e tupu ai le vevesi ona o le faaita o le isi o le isi.

O le mea la lea, e le toe faatagaina ona toe faaali ni manatu i lea vaega. Ae a foi, ia se i saunoa mai lau Afioga Papalii lau Afioga i le Minisita o Galuega.

Susuga Hon Papaliitele Niko Lee Hang (Minisita mo Galuega, Felauaiga ma Atinae Eseeese): Faafetai i lau Afioga i le Fofoga Fetalai mo le avanoa, ia sa ou manatu e le toe lagalaga le mataupu lea ua uma ona ou tali manino i ai i le sui usufono mamalu. Ma e le talosaga foi i le Minisita o Faamasinoga, e talosaga mai i le Minisita o la e pulea vaa. O lea la ua tali atu manino lava, e le mafai ona fai le tulaga lea. O lona uiga o le a atili ai ona gau le kamupani. O la e le o lelei .. a fai loa le fuafuaga lea, ia tefisite loa ma le Kamupani Vaa.

FOFOGA FETALAI: Ia, ae po o maua mai Namulauulu ia...

Tofa Namulauulu Sami Leota: Ia lea na maua atu i le saunoaga a le Minisita, o lea o le a tilotilo i ai ma tagatagai i ai lana Ofisa, Ofisa o Faigapalota, pe ofi i lalo o le latou Tala o le Tupe, fesoasoani la ia, o la e manino lava o Papalii e pule i vaa, ae e totogi la e le Ofisa o Palota, faafetai.

FOFOGA FETALAI: Ia toaga e...

Susuga Hon Papaliitele Niko Lee Hang: Lau Afioga i le Fofoga o le Fono, leai sa tatalo mai le sui usufono mamalu, i le Ofisa o Faamasinoga mo se fesoasoani mo le afaigaluega, e fai ia le faigapalota. O lea na ou talanoa atu ai, taatia mai aua e i ai le Paketi a le Matagaluega, e feagai la ma expenses ia le faatinoina o Faigapalota.

O lea la ma te le i talanoa ma le Minisita, po o le a se fuafuaga o i ai ia le latou paketi, a faapea e le o lava, ituaiga tulaga la ia e mafai ona fesoasoani ai le Ofisa o le Vaa. Ae o le taimi nei, e le i faatalanoaina le mataupu lea ma lou faaaloalo lava.

FOFOGA FETALAI: Ia tulai maia lau Afioga i le Minisita o Faamasinoga, e faaauau le saunoaga.

Afioga Hon FAAOLESA KATOPAU T AINUU: Lau Afioga i le Fofoga Fetalai e pau lava le mea ou te fia faamaonia o le faamatalaga lea sa ou avatua, o lo o feutagai le Ofisa o Tupe ma le Komesina o Faigapalota i se fuafuaga ina ia mafai ona o fua tagata ae totogi e le Ofisa o le Komisi o Faigapalota. E faamaonia le...

E tauatalagia foi... sa tautalagia foi..

Susuga Hon Laauli Polataivao Leuatea: Lau Afioga i le Fofoga Fetalai, e talia lava ma le agaga faafetai le saunoaga a le Minisita o Faamasinoga. Afai ae taunuu le mea lea, ua magalo uma ou sese.

FOFOGA FETALAI: Ia se i...

Afioga Hon FAAOLESA KATOPAU T AINUU: Ou te leiloa po o le a lou sese. E finau latou i le Pule ae sese ai au. Sa tautalagia foi e sui usufono ia le galuega o le fale Faamasino fou o fuafua mo Salelologa. Ua faagaioi i le taimi nei i le tusiga o le ata, ma ua i ai le fuafuaga o se taimi o Tesema ua amata ai le galuega lea, ona o le tapu lava o le Koviti-19, ua faatuituai ai lea galuega.

E tele foi fuafuaga a le Matagaluega o Faamasinoga, lea e fai i le faatinoina o ana galuega. O lea ua fai mo se taimi muamua lava, ona faaoga le video link, e connect ai le Ofisa o Faamasinoga i le Falepuipui i Tanumalala. O lona uiga, e mafai lava ona faaauau le faiga o le Faamasinoga, ae talatalanoa atu ia Faamasino i e o lo o molia, ae nonofo mai pea latou i Tanumalala.

O le aoga o lea fuafuaga, o le faaitiitia ai lea o le feaveaiga o pagota, aua le saogalemu o tagata lautele. Ua mafai foi ona tuu i luga o upega tafailagi, ia tatou mataupu e fofogaina i lea vaiaso ma lea vaiaso. O le fausiaina la o le fale fou i Salelologa, o le a faatotogaina ina ia mafai ona faatino auunaga ia ua uma ona ou taua.

O nei mea ua tolaulauina atu, o le taumafaiga lea a le Malo, e faataunuu nisi o galuega, e faafaigofie ai le ola soifua maloloina, ma le ola fiafia o tagatanuu o Samoa. Aua e pau le mea e fua i ai le ola manuia o tagatanuu o se atunuu, o le lava lea o le faasoia ma le faafaigofie ona faataunuu fuafuaga. O se manatu e faatupu manatu, o lo o tatou ola i se olaga faatemokarasi e fesui ai i le lalolagi mai lea taimi i lea taimi. Ma o le isi lea matafai ai a le Malo e tausaili faiga e talafeuga o tatou manaoga e faapea ia o tatou siosiomaga, aua e tofu lava ia itu o le lalolagi ma latou ituaiga faatemokarasi.

O se tuualalo i le paia o le Maota leni, ia tatala o tatou mafaufau, keep an open mind, i finauga e aumai i le Maota nei. E aumai i le itu agavale pe aumai i le itu taumatau, po o luga po o lalo, tatala o tatou mafaufau. Tuu ia feeseeseaiga faaletagata, ae tatou faia ia se faafinauga i le agaga o le finau, e fua i luga o tatou olaga, i se ituaiga faa-temokarasi e silisili ona lelei mo Samoa nei ma ataeao.

E pei o le agaga tonu lea, o lo o taoto ai nei Tulafono e 3 o lo o luga ma lalo ai le atunuu, faataua a tatou aganuu. Faataua le Pule a Alii ma Faipule. Ae e mafai ona ou faapea atu, o le finagalo lea o le Atua mo Samoa. O le ituaiga faa-temokarasi lea e lelei mo Samoa. Le Asosi o Alii ma Tamaitai Loia, ma le Vasega o Faamasino o le Faamasinoga Mauauga, tuu ese

auupega sa maua mai fafo i lo outou aoaoina, ae agai i fale o matai o tou nuu ma afioga. Faaaoga lo outou aoaoina e tapue ai mea lelei, ma tuu ese mea faa-le-lelei, o le ituaiga faatemokarasi lea ua faamaitemea ai le Malo. Ae e le o le saga tetee lava faaletatau, se o le uta a le poto e fetalai.

Ua outou silasila i le fua o le tamaoaiga mai le 1980 seia oo mai i le 2020? Ua le toe taua Samoa o se LDC, Least Develop Country. Po o se atunuu e sili ona vaivai le tamaoaiga i le lalolagi. O lea sa saunoa i ai le Afioga i le Palemia ma nisi o sui usufono mamalu i le tulaga o le GDP. A fua e na o galuega lelei, o fua na o galuega lelei o lo o fai e le Vaega Faaupufai a le HRPP mai i le 1982 e oo mai i lea aso. O lona uiga, o galuega uma lava o lo o fai e aofia ma Tulafono e 3, o fai i luga o le naunautaiga o le Taitai, o le Vaega Faaupufai leni, ia siisii le soifua laulelei o le atunuu. Ma e le tataua ona toe fesiligia le agaga o le Palemia, ma le Vaega Faaupufai leni, pe a fua i le tulaga o lea ua oo i ai le tamaoaiga o Samoa i le taimi nei.

E momoli atu lau faamalo, i le Taitaifono ma le Komiti mo le faatautaia o le faatalatalanoaga o Tulafono Tau Faaofi ia e 3. E le i soona filifilia outou, filifili outou e le Atua. Faamalo tau, e na o le Atua e sisila ona fofoga alofa i la outou galuega o lo o fai i le ao atoa ma le po.

Tofa Olo Fiti Afoa Vaai: Lau Afioga i le Fofoga Fetalai faamalulu atu

FOFOGA FETALAI: Ia se i tulai mai le sui usufono o Salega. E i ai se mea ua...

Tofa Olo Fiti Afoa Vaai: Ona o lea ua saunoa le Afioga i le Minisita i mea o tetee ma mea faapena. Ou te iloa ailoga o malamalama le Afioga i le Minisita i le faataatiaga mai o mea ia pe ua saunoa faa-Minisita o Tupe mai ae ou te iloa lava e le oo i ai lona silafia i le vaega lea. E te manatua foi, o lea ua fautuaina le Minisita, tago e faapasene lelei ia le eseeseaga o tua atu, ia ma le taimi nei, ina ona ia silafia lea o le mea e tau o le GDP e lelei ma le GDP e le lelei. Ia e pei o le mea lena.

Tofa Lealailepule Rimoni Aiafi: Lau Afioga i le Fofoga o le Fono...

FOFOGA FETALAI: Ia...

Susuga Hon Laauli Polataivao Leuatea: Lau Afioga i le Fofoga o le Fono...

FOFOGA FETALAI: Ia tulai mai le sui usufono o Gagaifomauga Nu.3.

Susuga Hon Laauli Polataivao Leuatea: Ia malie lava lau Afioga o si mea laitiiti lava. Ioe, e ta te popole lava ona o lea sa tau matila ia le Asosi a

le Au Loia, ia o latou e le mafai ona tali mai, ia ae ua oo foi le saunoaga a le Minisita ua aoai le fale o matai ma upu na.

Malie ia lau Afioga i le Minisita, malie, o nai tagata o le Tulafono Tumau e le mafai ona tatou agai sao, i se tagata e le mafai ona tali mai i totonu o le Maota. Ae ua lava ia lea, e le mafai ona tuu faaitiitia ia le latou aiatatau, le aiatatau o lo o i lalo o le Faavae, e saunoa ai latou. Ae malie ia lau Afioga, agai i le tulaga lautele, leaga e le mafai ona tali mai le Asosi o le Au Loia, i upu ma tala ia e aua le toe tetee ma fai uma na mea. Se malie lau Afioga i le Minisita, o oe foi o le isi loia, ia e pola puipui i ou uso ma tuafafine o lo o i fafo. O le latou lea aiatatau, o le faailoa mai o le fesoasoani mo Samoa. O le tuualalo lena, ma le agaga faaaloalo.

FOFOGA FETALAI: Ia ma e ai o...

Afioga Hon FAAOLESA KATOPAUT AINUU: Lau Afioga i le Fofoga Fetalai o le fautuaga le mea lena na avatu. O le tuualalo e le o se faatonuga, mo le silafia e le Maota.

FOFOGA FETALAI: Se i tulai mai le sui usufono

Tofa Hon Lauofo Fonotoe Pierre Lauofo: Lau Afioga i le Fofoga Fetalai, e puupuu lava si vaega lea faamolemole i lau Afioga.

Tofa Hon Lauofo Fonotoe Nuafesili Pierre Lauofo (Anoamaa Sisifo): Lau Afioga i le Fofoga Fetalai o le Maota, e puupuu lava si vaeg alea faamolemole lau Afioga. E leai, o le mafuaaga foi lea o le nofonofa o lou nei loia ne i te i ua faitau mai faapea ai e tetee atu foi se manatu i lena vaiaso ua tuana'i atu. A o le mea lava ia, ua le manatu foi e le sii lou vaa i ia mea, ona o le Afioga i le Minsita o le isi foi loia, o ia foi o le sui o le Sosaiete o Loia. O lona uiga, e tatau ona malamalama lelei i mea ia. A talanoa i mea faatemokarasi, o mea ia e fai e loia, e aofia uma lava i lalo o le faatemokarasi, o le aiatatau e faaleo ai foi o latou finagalo ma o latou foi silafia. O lona uiga, e taua uma lava mea uma. O le aoga lea o le aoao o manogi, ona aumai lea tatou saili po o fea tonu lava e tatau ona taoto ai le mataupu. O se taimi o muamua, aua o lea foi e faagasolo le galuega a le Komiti e le i taitai ona uma. A o se aso la o muamua masalo po o le masina o Aokuso ona oomai foi lea o le latou lipoti. A tatou vaavaai lea po o a ni teuteuga talafeagai e mafai ona faatino ona faataoto ai lea o le mataupu lea i le tulaga i lona agatonu.

Ia pei o le tala lea lau Afioga i le Fofoga Fetalai o le Maota. Faafetai mo le avanoa.

FOFOGA FETALAI: Toe tasi lava lea o le sui usufono mo Faleata Sisifo.

Tofa Lealailepule Rimoni Aiafi: Lau Afioga i le Fofoga Fetalai, o au sa ou lauga i le mataupu lea i le Tulafono. E leai, o lau foi faalogologo lau Afioga, o le tuualalo lea na fai e le Afioga i le Minisita, ae le i taofia e se isi, o lea lava ua tatou iloa o le temokarasi e le i taofia. A o le fautuaga i le Minisita, a e afio la i le mea e fai ai fono a nuu ma afioaga, e lautele ai lou silafia ina ia paleni ai lou opinion, paleni ai sau fautuaga.

Ae ui o lea, e tasi lava si au fesili lea ou te fia fesili ai i le Afioga i le Minisita ona o lea e taua tele le Tulafono lenei e tatau ona oo pea i ai sana faamalamalama, o le sootaga lea o fanua Samoa ma le Tulafono, ona tasi lea vaega o lea e tatai i ai e le toatele o i latou e tetee i le Tulafono e faapea e afaina ma fanua Samoa i le Tulafono lenei. E tuuina atu pea na fesili mo se faamalamalama a le Afioga i le Minisita. Ma le faaaloalo lava.

FOFOGA FETALAI: O lea ua maua atu. Ou te fautuaina lau Afioga i le Minisita, a i ai ni mea fou, e pule lava oe, a o tapena lelei e mafai ona tali, ae afai e te le o tapena i ai, ia aua le talia, ni mea fou e laga mai e sui usufono mamalu.

Afioga Hon FAAOLESA KATOPAU T. AINUU: E ala foi ona ou aogofie e tali atu lau Afioga i le Fofoga Fetalai, e faigofie ona tali.

FOFOGA FETALAI: Ae afai ua maea foi lau saunoaga ia e lelei foi ona maea lau saunoaga faa-Minisita aua o lea o le a ta le tatou taimi.

Afioga Hon FAAOLESA KATOPAU T. AINUU: E le o afaina nei mea o fanua. Ia o lea o le a faauma atu.

FOFOGA FETALAI: Ia faauma maia ae tautuana ma oe le fautuaga a le Palemene, e faapena. E faamalulu atu foi i sui usufono mamalu o le Palemene, o le tuutuualalo a le Minisita, ae faapena tatou. O ai o maua faailoga loia ae le i soso lava i le fale o matai, soso i le fale o matai, e maua ai foi lena filosofia ia aua tasi lena vaega o le temokarasi. Ia, pei o le fautuaga lea, ae faaiu maia le saunoaga a lau Afioga.

Afioga Hon FAAOLESA KATOPAU T. AINUU: E i ai sui usufono mamalu o lo o latou faasalaese i le Tulafono lenei. O lau fautuaga, a le maua se tou avanoa i le Komiti, o la e matala lou faitotoa, tou te susu atu e inu se tatou koko Samoa ma talatalanoa ai, atonu foi e maua ai nisi manatu fou.

Lau Afioga i le Fofoga Fetalai, ou te lagona ua maea mataupu sa laga.

Tofa Olo Fiti Afoa Vaai: Ua atili ai ona le malamalama tagata sole.

FOFOGA FETALAI: Ia malie ia Olo o lea ua maea le saunoaga a le Minisita.

Afioga Hon Loau Sola Keneti Sio (Minisita mo Aoga, Taaloga ma Aganuu): Lau Afioga i le Fofoga Fetalai, e mafai ona ou tali ia Olo pe a oo mai i lou taimi.

FOFOGA FETALAI: Ia, e faapena.

Afioga Hon FAAOLESA KATOPAU T. AINUU: Ua maea lau tali i sui usufono mamalu sa lagalaga mataupu e uiga i le Faamasinoga ma le Ofisa o Faigapalota. Faafetai mo lou avanoa. Ia faamanuia le Atua i lau Afioga aua lou valaauina. Ia manuia le Fonousu a Samoa.

FOFOGA FETALAI: Malo faafetai. Ia, ona o lea ua tatou taunuu mai i le taimi e manava ai le tatou galuega. Ia avea ia lenei avanoa e momoli atu ai le agaga faamalo ma le agaga faafetai i le paia o le Kapeneta ua faapena ona maea saunoa e faamanino ma faamalamalama mea sa laga e sui usufono mamalu o le Palemene. E faamalulu atu foi i sui usufono mamalu, e faapena, o lea e le i taitai le Aiga Kapeneta, faatoa toalua Minisita ia ua maea ona saunoa, ia o nisi foi o mea e le o maua lelei, o le a faapena foi ona toe saunoa i ai le Afioga i le Palemia e auli mai tua o le Kapeneta i mea e faapena ona le manino ma o lo o pau i saunoaga a le Aiga Kapeneta.

Ia o le a tatou faaiu i se tatalo ae tatou te le i tolopo. Ou te tapa lau Afioga i le Aoao Fesoasoani mo Faasaleleaga Nu.3 e tulai mai e faaiu le tatou Fonotaga i se tatalo lau Afioga Tofa.

Na tolopo Galuega a le Fono Aoao Faitulafono i le itula e 12:58 i le aoauli seia aulia le itula e 9:00 i le taeao o le Aso Lua, 23 Ianuari 2020.